

四庫全書

史部

欽定四庫全書

史部

山西通志卷一百四十六

詳校官給事中臣王鍾健

檢討臣德生覆勘

總校官進士臣朱鈐

校對官編修臣沈清藻

謄錄監生臣葛魏錫

欽定四庫全書

山西通志卷一百四十六

隱逸

三晉繇披衣蒲衣以降如絳縣老人北山丈人負苓者蓋已衆矣雖不克範中道而不能不高其行魏風曰中心好之曷飲食之蒐訂軼事亦杖杜之義匪直箕山潁水存巢許之孤踪也志隱逸

太原府

漢

郝子廉太原人風俗通太原郝子廉飢不得食寒不得衣一介不取諸人曾過姊飯留十五錢默置席下去每行飲水常投一錢於井中

閔貢字仲叔太原人世稱節士雖周黨之清潔自以弗及也黨見其食無菜遺之生蒜仲叔曰我欲省煩耳今更作煩耶受而不食建武中應司徒侯霸辟既至霸不及政事徒勞苦而已仲叔恨曰始蒙嘉命且喜

且懼今見明公喜懼皆去以仲叔為不足問耶不當
辟也辟而不問是失人也遂辭出投檄而去復以博
士徵不至客居安邑老病家貧不能得肉食買豬肝
一片屠者或不肯與安邑令聞勅吏常給焉仲叔怪
而問之知乃歎曰閔仲叔豈以口腹累安邑耶遂去
客沛以壽終

譚賢字伯升太原人王莽世與周黨胥守節不仕建武
中徵不至

王烈字彥方

魏志烈字彥考

太原人少師事陳寔呂義行稱鄉

里有盜牛者主得之盜請罪曰刑戮是甘乞不使王彥方知烈聞使人謝之遺布一端或問其故烈曰盜懼吾聞其過是有恥惡之心既懷恥惡必能改善故以此激之後有老父遺劍於路行道者見而守之至暮老父還尋得劍怪而問其姓名呂事告烈烈使推求乃先盜牛者也諸有爭訟曲直將質之於烈或至塗而反或望廬而還其呂德感人若此察孝廉三府

並辟皆不就遭黃巾董卓之亂乃避地于遼人尊奉
之太守公孫度接以昆弟之禮訪酬政事欲呂為長
史烈乃為商賈自穢得免曹操聞烈高名遣徵不至
建安二十四年終於遼年七十八

隋

鄭翻字靈雀太原晉陽人父紹元小字安都齊太尉諮
議趙郡太守翻少有器識博學好文章武平末位司
徒記室叅軍齊亡歷周隋不仕隱居滎陽三窟山傲

誕不自羈束或有所之乘驢衣鞮破弊而往遠近欽
其高名皆謂有異狀觀者如堵及見其形乃甚短陋
不副所聞然風神俊發無貴賤並敬服之納言楊素
聞其名因使過滎陽迎與相見言談彌日深加禮重
及歸言之朝廷累徵不至終於家

唐

武攸緒并州文水人惟良子恬淡寡欲好易莊周書少
變姓名賣卜長安市得錢輒委去後更授太子通事

舍人累遷揚州大都督府長史鴻臚少卿武后時封
安平郡王從封中岳固辭官后疑其詐許之攸緒廬
巖下如素遁者后遣其兄攸宣敦諭卒不起盤桓龍
門少室間冬蔽茅椒夏居石室賜金銀鐺鬲野服王
公遺鹿裘素障櫻栢麈昏流積不御也市田潁陽與
家奴雜作晚年肌肉銷青瞳有紫光晝能見星中宗
初降巢國公以安車召拜太子賓客苦祈還山詔可
安樂公主出降又以璽書迎之將至勅即兩儀殿設

位行問道禮詔見日山帔葛巾不名不拜攸緒至更冠帶仗入通事舍人贊就位攸緒趨就常班再拜禮不及行朝廷嘆息賜予無所受親貴來謁道寒溫外默無言及還朝官並祖城東俄而諸韋誅惟攸緒不及睿宗下詔慰諭復召拜太子賓客不就譙王重福之亂以誣被繫張說表置廬山中書令姚元崇奏賜嵩山舊居令州縣存問詔可開元十一年卒

溫佶字輔國祁縣人大雅四世孫天寶末助平原太守

顏真卿守李光弼厚遇之後居鄴薛嵩薦之授太常
寺丞一謝即去屏處郊野世推其高節

李源文水人愷子八歲家覆俘為奴史朝義敗故吏識
源於洛陽贖出之代宗聞授河南府參軍遷司農主
簿以父死賊手常悲憤不仕不娶絕酒葷惠林佛祠
愷舊墅也源依祠居闔戶日一食祠殿其先寢也每
過必趨未始踐階自營墓為終制時偃卧埏中長慶
初年八十矣御史中丞李德裕表薦曰賈誼稱守園

扞敵之臣死城郭封疆天寶時士罕仗節委符組棄
城郭者不為恥而愷約義同列守位自如抵刃就終
臣節之光由愷始而源天與至孝絕心祿仕五十餘
年常守沈默理契深要一辭開析百慮洗然抱此真
節棄於清世臣竊為陛下惜之穆宗下詔曰昔盜起
幽陵振蕩河洛贈太尉愷處難居首正色就死兩河
聞風再固危壁殊節卓焉到今稱之源有曾參之行
巢父之操泊然無營汜此高年夫褒忠所以勸臣節

也旌孝所以激人倫也鎮澆淳莫如尚義厚風俗莫如尊老舉是四者大儆於時其以源守諫議大夫賜緋魚袋河南尹遣官敦諭上道上自遣使者持詔書袍笏即賜又賜絹二百匹源頓首受詔附表謝辭吐哀慙一無所受尊卒敬宗時擢澄孫河南兵曹參軍

宋

邢昂高蹈不仕冠準陳堯佐范仲淹文彥博胥贈詩卒葬晉祠南原張景儉表墓

金

王中立字湯臣岢嵐人博學強記問無不知少治易有聲場屋間家豪於財賓客日滿門待之極豐腆年四十喪妻不更娶亦不就舉齋居如衲僧三四年出時人覺其談吐高濶詩筆字畫皆超絕若有物附之者問之不言也趙秉文知平定往謁之遺詩云寄與閑閑傲浪仙枉將詩酒污天全黃塵遮斷來時路不到蓬山五百年因言唐世士大夫五百人皆仙人謫降

中有為世味所著迷而不返者如公與我皆是也晚
年易名雲鶴自號擬桐詩甚多人問世外事亦一二
言之好作擘窠大字往往瞑目為之筆意縱放勢若
飛動秉文甚愛之李之純嘗共商畧前代人物歎服
以為辨博中第一流人也臨終預尅死期如言而逝
州將石倫葬之忻州時年五十六

趙達夫太原人性嗜讀書而不嗜科舉南渡後居緱氏
山中安貧守分有詩傳世

元

謝默字蘊中榆次人篤志好學博通經籍養母以孝聞

高尚弗仕

明

張圖南字拙菴文水人性倜儻怡志泉石好讀人間未見書間亦歌詩摹帖以自適直指高其操親詣之談陋室敞席間食蔬食菜羹歡如也晚年家益貧行益高每遇佳山水輒留連不去或勸之仕笑曰廟中之

犧漆園吏不為而謂吾為之乎

孫綽太原人慷慨有大志能文章千言立就闖變偕鄭
伯陽段樵隱沁源山中後鄭歸授徒自給二人不知
所終

平陽府

陶唐

席老師一作壤父堯時賢人失其名時天下太和百姓
無事老師年八十餘擊壤于衢觀者曰大哉帝之德

也老師曰吾日出而作日入而息鑿井而飲耕田而食帝力何有於我哉舊志襄陵人

周

晉漁者文公出田逐獸碭入大澤迷不知所出中有漁者導出之曰臣願有獻鴻鵠保河海之中厭而欲移徙之小澤則必有九繒之憂龜鼉保深淵厭而出之淺渚則必有弋網釣射之憂今公逐獸碭入至此何行之太遠也文公曰善哉謂從者記漁者名漁者曰

公何以名為公其尊天事地敬社稷周四國慈愛萬民薄賦斂輕租稅臣亦與焉公不敬社稷不周四國外失禮於諸侯內逆民心一國流亡漁者雖得厚賜不能保也遂辭不受曰公亟歸國臣亦反吾漁所越者英賢傳晉有高人越者隱伏於北唐因氏焉

漢

河上丈人翼城人明老子之術自匿姓名居河之湄故號曰河上丈人又河上丈人沃志作河上公今河上

村即其隱居地也

魏

焦先字孝然河東人中平末年二十餘避白波東客揚
州建安初西還留陝界十六年失家屬獨竄大陽河
渚間食草飲水無衣履結草為裳縣常使埋藏疫病
人童兒皆輕易之然先行不踐邪徑必循阡陌捃拾
不取大穗飢不苟食寒不苟衣出見婦人則隱翳須
去乃出自作一蝸牛廬淨埽其中營木為牀布草蓐

天寒構火自炙饑則出為人客作飽食而已不取其
直常言草茅之人與狐兔同羣不肯妄語太和青龍
中嘗持一杖南渡淺河水漲輒獨云未可也由是人
頗疑不狂河東大守杜恕以衣服迎見而不與語嘉
平中太守賈穆故過其廬與語不應與食不食明年
大發卒將伐吳有竊問者先不肯應而謬歌曰祝劔
祝劔非魚非肉更相追逐本心為當殺牂羊更殺其
殺癡邪人莫知所謂會諸軍敗好事者疑牂羊謂吳

殺癡謂魏是後僉謂之隱者議郎河東董經密往觀之挑欲與語不肯應後野火燒廬因露寢袒卧雪中不移卒年八十九

前宋

關康之字伯愉河東揚人僑京口轉僑南昌少而篤學姿狀豐偉與下邳趙繹友善特進顏延之等當時名士十許人入山候之見其散髮披黃布席松葉枕白石而卧了不相眄延之等咨嗟而退不敢干也晉陵

顧悅之難王弼易義四十餘條康之申王難顧遠有
情理又為毛詩義經籍疑滯多所論釋嘗就沙門支
僧納學筭妙盡其能徵辟一無所就棄絕人事守志
閒居弟雙之為臧質車騎參軍卒於赭圻痰水濱康
之迎喪而病寢頓二十餘年時有間日輒卧論文義
宋孝武初大使薦康之宜加徵聘不省康之性清約
獨居一室希見妻子絕賓客弟子以業傳受河南辛
普明尤肖之善左氏春秋齊高帝嘗送本與康之康

之手自點定又造禮論十卷高帝絕賞愛之宋太始
初徵辭以疾

金

段思趙城人隱居南步里草舍三間鄉里莫覩其顏面
敦武校尉仇絃悉其賢為撰遠塵菴記有碑

明

吉士臨汾縣人士少讀書明大義而雅嗜奇山水既長
有文名同列咸斂手推避闖逆破平陽召試諸生授

以偽職士閉戶不應或以利害怵之不為動後優游
巖壑間以老有枕流漱石之風

潞安府

漢

馮胄字世威上黨人奉世之後也為司徒李邵門人邵
卒獨制服心喪三年時人異之胄常慕周伯况閔仲
叔之為人隱處山澤不應徵辟

唐

馮裴上黨人與子元俱以琴書自娛不樂仕進以隱士稱

郝洽字元津上黨人祖溫元魏時以門第為本州中正洽隱居潞之西火元宗為潞別駕出獵與語奇之因造其第及後即位授以官不拜終身稱處士賜田給養焉

田佐時潞州處士建中三年黜陟使裴伯言薦之詔除集賢院直學士宰相張鎰以為禮輕恐士不勸復詔

州縣吏以絹百匹粟百石就家致聘佐時卒不至

元

王綱長子人從陝西侯伯政講性理不樂仕進築粹經樓於家廣積經史教子弟

汾州府

周

吉桑西河舟人趙簡子游於西河而樂之嘆曰安得賢士而與處焉吉桑曰此吾君不好之也簡子曰吾門

左右客千人朝食不足暮收市征暮食不足朝收市
征吾可謂不好士乎吉桑曰鴻鵠高飛遠翔其所恃
者六翮也背上之毛腹下之毳無尺寸之數加之滿
把飛不能為之益高不知門下左右客千人者六翮
之用乎將盡毛毳也

介之推晉人文公微臣也從文公出亡及反國公賞從
亡者推不言祿祿亦弗及與其母隱去公求之不獲
聞其入緜上山中於是環緜上山中而封之以為介

推田號曰介山韓詩外傳晉文公過曹里鳧須從因盜重耳藏而亡重耳無糧餒不能行介子推割股以食重耳然後能行史記推至死不復見其從者憐之乃懸書宮門曰龍欲上天五蛇為輔龍已升雲四蛇各入其宇一蛇獨怨終不見所處文公出見其書曰此介子推也使人召之則亡後宋封推為潔惠侯

元

王天祺號秋巖汾陽人喜讀書善屬文以教職茂異

辟胥辭疾不赴諄諄善誨成就弘多狀元張益其一
也人稱秋巖先生門人李峽等為之立碑

大同府

魏

韓珩代郡人清粹雅量奉養兄姊族以孝弟稱魏太祖
高其節屢辟不至

元

王忠栗州人負志奇偉不樂仕進妻亡不復娶多與奇

士遊彈琴弈棋終日坐茂林中遇晚即卧木上後卜

蘆芽山結廬以居更名雲鶴洒然有商山富春之致

澤州府

唐

郭樸陵川人文藝兼通孝友大著刺史屢薦辭不就道
遙泉石以此自終

司徒映澤州人官太常卿太和中棄官歸里晦迹藏名
清修砥礪屢起不仕

韋況陽城人少隱王屋山孔述睿知其賢薦為拾遺不
拜未幾以起居郎召居半載輒棄官歸徙家龍門累
徵不起元和初強起諫議大夫未幾復乞致仕况貴
由勵志冲遠不為聲利所奪當世重其風操

宋

王載道沁水人少穎慧於書無所不讀宋宣和間以明
經舉進士不第金人南侵大河南北地胥陷沒遂輟
舉子業隱於鹿臺山且耕且讀後進高其行多所師

事金天眷間省檄屢辟俱辭不應所著有鹿臺稿詩
稿藏於家學者稱為鹿臺先生

張宗古高平人幼負大志優於文學父母早逝或勸之
仕曰仕以行志也親老而養不逮吾志安乎樂善喜
施嫁宗孤女五人瘞貧乏者十餘家當時宗族兄弟
例得守本郡有至者屏居山澤不一造其門既罷情
禮如初人胥稱孝廉云

都睢陵川人博覽經籍隱邑南錦屏山令呂由庚薦不

起一時名人谷漢臣高子美輩嘗就訪焉

金

張克柔高平人以理學自負性爽慨重然諾卷跡山林
布衣蔬食處之澹然顯者每顧其廬苟非其人則辭
而避之

元

白處善澤州人性警敏有學行嘉遯不仕世祖高其志
勅曰身都道義漠然無名利之心家富詩書樂矣有

田園之趣賜號義安處士

李希白高平人有駿材時元季謂鄉人曰此忠臣義士
奮發之秋吾力不能而復覩顏事之恥也遂屏居無
仕進意一時朝士俱知其名

張起巖高平人性嚴重與人寡合獨與韓維學游為忘
年友同隱居龍山號東崖維學嘗語人曰張東崖宋
魏野之流也日相過從放歌自適著有泣水倡和集
張才高平人與兄播齊名恬退不仕常種瓜自給

張汝弼高平人事親孝以詩名世遁迹莒山嘯歌獨行
性甘薇自號薇田扁其室曰薇齋

郝彝字仲常陵川人文忠公仲弟經明行修不仕

明

陳錦高平人性高鯁幼習舉子業恥事剿說後隱於西
山之麓曰修不必耀貴不必爵知不必人行不必身
竟以此自終時高其操

王克耘陽城人善詩賦不仕結知止齋藏修終身

蒲州府

上古

蒲衣子舊志蒲伊子蒲縣人一名蒲衣子以其衣蒲故名

或云姓伊名疇五帝時人隱士也渾渾噩噩抱道

而潛居於蒲谷山中

即蒲子山縣之得名以此

堯都平陽聞其賢

躬往師之有講道臺稅駕坡遺址微存高士傳蒲衣

子者舜時賢人也年八歲而舜師之齧缺問於王倪

四問而四不知齧缺因躍而大喜行以告蒲衣子蒲

衣子曰而乃今知之乎有虞氏不及泰氏有虞氏其
猶臧仁以要人亦得人矣而未始出於非人泰氏其
卧徐徐其覺于于一以已為馬一以已為牛其知情
信其德甚真而未始入於非人也後舜讓天下於蒲
衣子蒲衣子不受而去莫知所終

路史蒲衣之故國
河中之河東西二

里蒲津
關也

披衣生八歲舜異以天下高士傳披衣者堯時人也堯
之師曰許由許由之師曰鬻缺鬻缺之師曰王倪王

倪之師曰披衣齧缺問道於披衣披衣曰若正汝形
一汝視天和將至攝汝知一汝度神將來舍德將為
汝美道將為汝居汝瞳焉如新生之犢而無求其故
焉未卒齧缺睡寐披衣大悅行歌而去之曰形若稿
骸心若死灰真其實知不以故自持媒媒晦晦無心
而不可與謀彼何人哉

一云披衣蒲衣之子
路史蒲衣即披衣

唐

薛業汾陰人天寶間處士也西遊廬山補闕趙驛侍御

史王定評事張有略各以文贈獨孤及嘗稱其敦於詩困於學敏於行口弗言祿祿亦不及識其真者以為永歎以為景慕

李純夫臨晉人隱居不仕構了了菴亭於王官谷貽溪之上元宗召之不起號孤雲子

宋

李瀆河中人其先世居洛陽曾祖郃梁崇政使後唐以太子少傅致仕父瑩字正白善詞賦廣順進士蒲帥

張鐸辟記室因家河中乾德初為殿中侍御史度支
判官使江南授右贊善大夫卒初瑩禱河祠而生瀆
故名瀆字河神後改字長源淳澹好古博覽經史十
六外艱杜門不復仕進家世多聚書畫王祐典河中
深加禮待名益著時往來中條山中不親產業所居
木石幽勝談唐室已來衣冠人物歷歷可聽罕著文
前後州將皆厚遇之王且李宗諤每勸其仕皆不答
乘馬嘗為宗人借總於廛間瀆即驚之其惡器如此

州間化其儉德祀汾陰孫冕言其隱操陳堯叟復薦之召見辭足疾不起遣內侍勞問令長吏歲時存撫明年又存問瀆自陳習靜避世意素嗜酒嘗曰扶羸養疾捨此莫可從吾所好以盡餘年不亦樂乎天禧三年語諸子曰山水足以娛情苟遇醉而卒吾之願也吾將與爾永訣爾輩當常在左右即設外寢同處一日忽曰適有人至牀下誦詩云行到水窮處未知天盡時言訖不見吾當逝矣亟取瑩集七十篇洎書

畫付諸子促家人置酒頃之卒年六十三贈秘書省
著作佐郎賜其家帛二十匹米三十斛州縣常加存
卹蠲羨役

張愈字少愚河東人僑郾雋偉有大志遊學四方屢舉
不第寶元初上書言邊事請使遼其論甚壯用使者
薦除試秘書省校書郎願以授父顯忠而隱於家帥
文彥博置青城山白雲谿杜光庭故居以處之內艱
鹽酪不入口再期植所持柳杖於墓忽生枝葉後合

抱六召不應喜弈棋樂山水遇有興雖數千里輒盡
往遂浮湘沅觀浙江升羅浮入九疑買石載鶴以歸
杜門著書未就卒

金

薛繼先字曼卿南渡後隱居洛西山中課童子讀書事
母孝與人交謙遜和雅所居化之子純孝字方叔有
父風有詐為曼卿書就方叔取物者曼卿年已老有
少容容不知其為曼卿而以為方叔也與之書曼卿

如所取付之監察御史石玠行部遇曼卿拒不見或
言君何無鄉曲情曼卿曰今時政未必皆善御史一
有所劾將謂自我發之同惡相庇他日并鄉里必有
受禍者其畏慎皆此類壬辰之亂病沒宜陽

馮志恩滎河人九歲入學受書一再讀輒成誦博考經
史崇尚志節貞祐間避亂秦華遇隱者田元圃語相
契遂師事焉田傳以秘訣豁然開悟壬辰兵息復還
故鄉依先人茅屋一意操存以道自樂平生未嘗有

疾及年老行不杖坐不倚氣爽神清目有餘光

明

楊守中字彥庸猗氏人博通經史尤善詩文有隱德洪武間詔至內府欲官之伏而不謁垂半載不易其志詔送還原籍

孫達猗氏人邃於學洪武甲子再行科舉舉第一聯雋進士志尚卓然鍵戶深居寄意詩文以自娛同年黃太常子澄練都院子寧常延入客座上下其議論靖

難兵起黃練見殺達痛哭入山長往不返子孫亦莫知其處

沁州

元

邢安國武鄉人少以詩賦名年踰四十遂絕意科舉以詩酒自娛避亂客沁陽十餘年後北歸備歷艱苦往往見於所著詩

平定州

宋

張象仁孟縣人嵩季子登熙寧六年進士授校書郎上
仁宗時宜五事落職隱白鹿山不交當道者五十餘
年見丞相呂思誠墓表

元

田傑孟縣人領大德四年鄉薦性淳厚不樂仕進內孝
於父母外信於朋友輕財重義尤善屬文教授鄉里
不倦人有片善惟恐稱道之不足若非義相干怡然

不與校鄉人賢之

明

溫良字從善孟縣人少聰慧有奇氣未冠補邑庠生旋棄去隱於北鄉

忻州

北魏

薛雲忻州人性嗜學不樂仕進隱州西南繫舟山讀書自適以終其身今名其谷曰薛雲谷

宋

劉易忻州人性介烈博學好古喜談兵韓琦知定州上其所著春秋論授太學助教并州學說書不能屈志仕進寓號之盧氏習辟穀術趙抃復薦其行誼賜退菴處士易作詩琦每為書石或不可其意輒滌去琦亦再書之尹洙帥渭延致尊禮狄青代洙遇之亦厚治平末卒琦作文祭云剛介之性天下能合者有幾淵源之學古人不到者甚多其敬之如此熙寧訪

察定戶役詔易家用處士如七品恩得減半示優禮
云

元

張惟善忻州人藏書萬卷隱居授徒出其門者多名人
其墓銘曰於維先生學傳聖心文經是式詩雅斯欽
上希陳邵晦迹幽深

代州

漢

周黨字伯況太原廣武人家產千金少孤為宗人所養而遇之不以理及長又不還其財黨詣鄉縣訟主乃歸之既而散與宗族悉免遣奴婢遂至長安遊學初鄉佐嘗衆中辱黨黨久懷之後讀春秋聞復讐言之義便輟講而還與鄉佐相聞期尅鬪日既交刃而黨為鄉佐所傷困頓鄉佐服其義輿歸養之數日方蘇自此勅身修志州里稱其高及王莽竊位託疾杜門自後賊暴縱橫唯至廣武過城不入建武中徵為議郎

以病去職遂將妻子居澠池復被徵不得已乃著短
布單衣穀皮綃頭待見尚書及引見伏而不謁自陳
願守所志帝乃許焉博士范升奏黨曰臣聞堯不須
許由巢父而建號天下周不待伯夷叔齊而王道以
成伏見太原周黨東海王良山陽王成等蒙受厚恩
使者三聘乃肯就車及陛見帝廷黨不以禮屈伏而
不謁偃蹇驕悍同時俱逝黨等文不能演義武不能
死君釣采華名庶幾三公之位臣願與坐雲臺之下

考試圖國之道不如臣言伏虛妄之罪而敢私竊虛名誇上求高皆大不敬詔曰自古明王聖主必有不賓之士伯夷叔齊不食周粟太原周黨不受朕祿亦各有志焉其賜帛四十疋黨遂隱居澠池著書上下篇而終邑人賢而祠之

王霸字儒仲太原廣武人少有清節王莽世棄冠帶絕交宦建武中徵至尚書拜稱名不稱臣有司問之霸曰天子有所不臣諸侯有所不友司徒侯霸讓位於

霸故梁令閻陽毀之曰太原俗黨儒仲頗有其風遂
止以病歸隱居守志茅屋蓬戶連徵不至以壽終
荀愨字君大太原廣武人少修清節資財千萬父越卒
悉散與九族隱居山澤以求厥志光武徵以病不至
永平初東平王蒼為驃騎將軍辟而應焉及後朝會
顯宗戲之曰先帝徵君不至驃騎辟君而來何也對
曰先帝秉德以惠下故臣可不來驃騎執法以檢
下故臣不敢不至後月餘罷歸卒於家

殷謨字君長鴈門人王莽世與周黨胥守節不仕建武
中徵不至

前宋

周續之字道祖鴈門廣武人僑豫章建昌縣八歲喪母
哀戚過成人奉兄如事父豫章太守范甯立學招集
生徒續之年十二詣甯受業數年通五經五緯號曰
十經名冠同門稱為顏子既而間居讀老易入廬山
事沙門釋慧遠與劉遺民陶淵明稱潯陽三隱劉毅

鎮姑孰命為撫軍參軍徵太學博士並不就江州刺史招請頗從游常以嵇康高士傳得出處之美因為之註宋武帝世子居守迎館於安樂寺延入講禮月餘復還山江州刺史劉柳薦之辟太尉掾不就武帝鎮彭城遣使迎之禮賜甚厚每曰真高士也尋復南還宋初復召之上為開館東郭外招集生徒乘輿降幸并見諸生問續之禮記傲不可長與我九齡射於矍圃之義辯析精奧稱為名通續之素患風痺乃移

病鍾山景平元年卒通毛經六義及禮論註公羊傳
於世無子兄子景遠有續之風

宋

代淵字蘊之代州人唐末僑導江家世為吏有陰德淵
性簡潔事親孝受學於李旼張達舉進士甲科得清
水主簿歎曰祿不及親何所為耶還家教授坐席常
滿安撫使舉鳳州團練推官不就知益州楊日嚴又
薦之遂以太子中允致仕謝絕諸生著周易旨要老

佛雜說數十篇田況上其書自太常丞改祠部員外
郎晚年日菜食巾褐山水間自號虛一子長吏致問
澹然與對略不及私嘉祐二年九月疾召術士擇日
云丙申吉頷之是日沐浴而絕

元

王德素崞縣人朴之子性忠孝有智畧大衆楊公辟為
幕官未久稱疾去寓汴中當路交薦除汴梁路雜造
總管不就卒子九齡痛父早亡誓不就仕事叔父德

柔尤謹辟為夔河令不就又辟為榆次令不踰月解
組去時人嘉其尚志

解州

上古

許由高士傳由字武仲陽城槐里人為入據義履方邪
席不坐邪饒不食後隱於沛澤之中堯讓天下於許
由曰日月出矣而爝火不息其於光也不亦難乎時
雨降矣而猶浸灌其於澤也不亦勞乎夫子立而天

下治而我猶尸之吾自視缺然請致天下許由曰子
治天下天下既已治也而我猶代子吾將為名乎名
者實之賓也吾將為賓乎鷦鷯巢於深林不過一枝
偃鼠飲河不過滿腹歸休乎君子無所用天下為庖
人雖不治庖尸祝不越樽俎而代之矣不受而逃去
齧缺遇許由曰子將奚之曰將逃堯曰奚謂邪曰夫
堯知賢人之利天下也而不知其賊天下也夫唯外
乎賢者知之矣由於是遁耕於中岳潁水之陽箕山

之下堯又召為九州長由不欲聞之洗耳於潁水濱
時其友巢父牽犢欲飲之見由洗耳問其故對曰堯
欲召我為九州長惡聞其聲是故洗耳巢父曰子若
處高岸深谷人道不通誰能見子子故浮游欲聞求
其名譽汚吾犢口牽犢上流飲之許由沒葬箕山之
巔亦名許由山在陽城之南十餘里堯因就其墓號
曰箕山之神以配食五岳世世奉祀至今不絕也又
云堯之師曰許由舊志平陸人

周

段干木晉人史記魏文侯受子夏經藝客段干木過其
間未嘗不軾也秦嘗欲伐魏或曰魏君賢人是禮國
人稱仁上下和合未可圖也文侯由此得譽於諸侯
高士傳干木晉人也守道不仕魏文侯欲見造其門
干木踰牆避之文侯以客禮待之出過其間而軾其
僕曰君何軾曰段干木賢者也不趣勢利懷君子之
道隱居窮巷聲馳千里吾安得勿軾干木先乎德寡

人先乎勢干木富乎義寡人富乎財勢不若德貴財
不若義高又請為相不肯後卑已固請見與語文侯
立倦不敢息淮南子段干木晉之大馭而為文侯師
呂氏春秋魏文侯見段干木立倦而不敢息及見翟
璜踞於堂而與之言翟璜不悅文侯曰段干木官之
則不肯祿之則不受今汝欲官則相至欲祿則上卿
至既受吾賞又責吾禮無乃難乎

魏

闕朗字子明解州人有經濟大器妙極占算浮沈鄉里
不求宦達魏太和末王蚪署朗為記室蚪與談易歎
曰足下奇才也言於孝文詔見問老易朗寄發玄宗
實陳王道諷帝慈儉為本飾之以政刑禮樂帝嘉歎
謂蚪曰先生知人矣昨見子明管樂之器既而頻日
引見會帝有烏丸之役勅子明隨蚪出鎮并州軍國
大議馳驛而聞朗終不仕蚪子彥師事朗受春秋及
易共隱臨汾山

隋

夏城牧豕者居夏城以牧豕為業文中子之夏城薛收
姚義後過之而問塗焉牧者曰從誰與收曰從王先
生也牧者曰有鳥有鳥則飛於天有魚有魚則潛於
淵知過者蓋默默焉文中子聞之謂收曰獨善可矣
不有言者誰明道乎

唐

衛大經蒲州解人卓然高行口無二言武后召之固辭

疾素善魏夏侯乾童聞其母卒盛暑步往弔或止之
曰不如致書答曰書能盡意耶比至乾童以事行乃
設席行弔禮不詢其家而還開元初畢構為刺史使
縣令孔慎言就謁辭不見大經邃於易人謂之易聖
預筮死日鑿墓自為志如言終

元

岐裕齋解州人隱居不仕學行鳴於時於所居西南建
孔顏曾燕居室及學舍歲時率鄉人修祀事習禮儀

叙鄉飲少長之節教樹蓄敦行誼子孫耕讀以為世
守甘貧賤無外慕鄉里化之生六子皆以卿名張禎
有六卿詠

明

王昱字穉陽夏縣人事親孝人咸稱為王孝子貧而有
守不苟言笑不事舉業從曲子曰講學與安邑孝廉
李貞佐善貞佐任郊縣昱訪焉流賊至李促昱行昱
曰安趨而危去吾不忍也城破李罵賊死李母喬亦

為賊害家人俱逃昱獨從不去賊削其耳鼻仍不去賊詰之曰令吾友也冀得收其骸骨耳賊義之釋不殺收貞佐屍並其母葬於郟縣之城南飄然長往不知所終

絳州

周

絳縣老晉悼夫人食輿人之城祀者絳縣人或年長矣無子而往與於食有與疑年使之年曰臣小入也不

知紀年臣生之歲正月甲子朔四百有四十五甲子矣其季於今三之一也吏走問諸朝師曠曰魯叔仲惠伯會郤成子於承匡之歲也七十三年矣史趙曰亥有二首六身下二如身是其日數也士文伯曰然則二萬六千六百有六旬也趙孟問其縣大夫則其屬也召之而謝過焉欲仕之使助為政辭以老與之田使為君復陶以為絳縣師而廢其輿尉

北魏

裴安祖聞喜人性慧好學閒居養志或勸其仕安祖曰
高尚之事非所敢當但京師遼遠實憚於栖遲耳後
魏高祖幸長安見安祖甚悅拜安邑令以老辭詔給
一時俸以供湯藥

隋

河上丈人居河間文中子遊河間之渚丈人曰何居乎
斯人也心若醉六經目若營四海何居乎斯人也文
中子去之薛收曰何人也文中子曰隱者也收曰盍

從之乎曰吾與彼不相從久矣至人相從乎曰否也
北山丈人居北山即東臯子所賦北山也謂文中子曰
何為遑遑者無乃急與文中子曰非敢急傷時急也
仲長子光字不耀遊于河東人問者書老易二字為對
嘗曰在險而運奇不若宅平而無為文中子以為知
言嘗謂子光曰山林可居乎曰會逢其適也焉知其
可文中子曰達人哉隱居放言也又曰其名彌消其
德彌長其身彌退其道彌進此人其知之矣薛收問

政于子光子光曰舉一綱衆目張弛一機萬事墮不知其政也文中子曰子光得之矣收問子光何人文中子曰天人也收曰何謂天人文中子曰眇然小乎所以屬於人曠哉大乎獨能成其天又曰仲長子光天隱者也無往而不適矣王績著仲長先生傳

唐

王績字無功絳州龍門人性簡放不喜拜揖兄通隋末大儒知績誕縱不嬰以家事鄉族慶弔冠婚不與也

與李播呂才善大業中舉孝弟廉潔授秘書省正字
求為六合丞以嗜酒不任事因劾解去嘆曰羅網在
天吾且安之乃還鄉里有田十六頃在河渚間奴婢
數人種黍春秋釀酒養鳧鴈蒔藥草自供以周易老
子莊子置牀頭他書罕讀也欲見兄弟輒度河還家
游北山東臯著書自號東臯子乘牛經酒肆留或數
日高祖武德初以前官待詔門下省貞觀初以疾罷
復調有司固求太樂丞自是太樂丞為清職刺史崔

喜悅之請相見答曰奈何坐召嚴君平耶卒不詣杜
之松故人也為刺史請績講禮答曰吾不能揖讓邦
君門談糟粕棄醇醪也初兄疑為隋著作郎換隋書
未成死績續餘功亦不能成預知終日命薄葬自誌
其墓績之仕以醉失職鄉人斫之託無心子以見趣
曰無心子居越越不知其大人也拘之仕無喜色越
國法曰穢行者不齒俄而無心子以穢行聞王黜之
無愠色退而適茫蕩之野過動之邑而見機士機士

撫髀曰嘻子賢者而以罪廢耶無心子不應機士曰
願見教曰子聞蜚廉氏馬乎一者朱鬣白毳龍髻鳳
臆驟馳如舞終日不釋轡而以熱死一者重頭昂尾
蛇頸貉膝跽齧善蹶棄諸野終年而肥夫鳳不憎山
栖龍不羞泥蟠君子不苟潔以懼患不避穢而養清
也其自處如此

五代

裴謙聞喜人度孫郁子有才學以五代亂晦迹不仕避

兵徙同州白水縣卒葬其里

裴宗煥聞喜人隱居不仕以詩書自娛卒葬垣曲

裴普聞喜人謙子博通經史不求聞達

宋

韓退稷山人隱居不仕一時名流多推重之康定間以
待制吳遵路等薦奉詔賜絹米大陽里人掘地得遺
碑具詳其事

金

房居安字敬之河津縣人祖信父倚金季為萬戶都統
居安嗜學不倦第鄉貢進士甫就廷試而汴亡遂隱
居終身與遊菴段克巳訂論正學使諸子師事之葛
巾藜杖詩酒自怡數年卒至正初段秉昭題其墓曰
處士先生銘曰先生之生斯文有光一舉鄉解人覩
異常天地經變晦跡弗彰甘分遯隱得失誰量

郝衡稷山人舉進士隱居教授以德行稱

元

段承祚稷山人自幼業太學謙和好禮動止有則任國
子學正以母老歸養屢徵不起教授于鄉有敦薄立
懦之風時人稱為德門先生

明

李貞絳州人洪武時劉基薦為遂昌縣主簿靖難後隱
居不出永樂二年徵至京師授以官不就賜宴歸

山西通志卷一百四十六

欽定四庫全書

史部

山西通志卷一百四十七

詳校官給事中臣王鍾健

檢討臣德生覆勘

總校官進士臣朱鈐

校對官庶吉士臣吳裕德

謄錄監生臣湯師錫

欽定四庫全書

山西通志卷一百四十七

寓賢一

三晉山巖複阻而昔之名賢往往流連其地而不能去自獲澤七友首陽二士以後如子產季札晏嬰其遺風餘韻之存於載籍者固已多矣唐宋如李杜韓歐胥客晉錄其習久者蓋以申僑札之分也志寓賢

太原府

周

蔡澤燕人見逐於趙而入韓魏遇奪釜鬲於涂間應侯
任鄭安平王稽皆負重罪應侯內慙乃西入秦說應
侯辭位秦昭王召見與語大悅之拜為客卿應侯免
相遂拜澤為秦相東收周室澤相秦數月謝病號為
剛成君

漢

第五種字興先少勵志義永壽中拜兖州刺史時單超

兄子匡為濟陰太守種糾發其賊罪並以劾超超積
懷忿恨遂以事陷種竟坐徙朔方超外孫董援為朔
方太守稽怒以待之初種為滑相以門下掾孫斌賢
善遇之及當徙斥斌具聞超謀乃謂其友人同縣閻
子直及高密甄子然曰蓋盜憎其主從來舊矣第五
使君當投裔土而單超外屬為彼郡守夫危者易仆
可為寒心吾今方追使君庶免其難若奉使君以還
將以付子二人曰子其行矣是吾心也於是斌將俠

容晨夜追種及之於太原遮險格殺送吏因下馬與種斌自步從一日一夜行四百餘里遂得脫歸種匿於閭甄氏數年徐州從事臧旻上書訟之會赦出卒於家

鄭康成高密人嘗著戒子書曰吾家舊貧不為父母羣弟所容去廝役之吏游學周秦之都往來幽并兗豫之域獲勤乎在位通人處逸大儒得意咸從捧手有所受焉

魏

楊俊字季才河內獲嘉人受學陳留邊讓以河內處四
達之衝詣京密山間轉避地并州本郡王象少孤時
為人僕隸年十七八使牧羊而私讀書因被箠楚俊
嘉其才質即贖象著家聘娶立屋然後與別魏初任
南陽太守以嘗稱臨苗侯被禍衆寃之

晉

周虓南安城人少有節操寧康初任梓潼太守為苻堅

所獲欲以為尚書郎不受屢詆堅欲謀襲之堅引問
狀琥曰昔豫讓為智伯臣猶漆身吞炭不忘忠節况
琥世荷晉恩豈敢忘耶堅乃徙於太原病卒後子興
迎致其喪冠軍將軍謝玄臨哭之為請贈龍驤將軍
益州刺史賻錢二十萬布百疋以贍賜其家

北魏

元丕魏高祖時遷太尉錄尚書事時淮南王他淮陽王
尉元河東王苟頹並以舊老見禮每有大事引入禁

中乘步挽杖於朝進退相隨丕他元三人皆容貌壯
偉腰帶十圍大耳秀目鬚鬢斑白百僚觀瞻莫不祇
聳唯荀頹小為短劣姿望亦不逮之丕復遷太傅以
老居并州會穆泰等不樂南遷丕心頗然之詔丕應
連坐免為太原百姓其後妻二子聽隨時丕年垂八
十猶自平城力載隨駕至洛陽高祖每遣左右慰勉
之乃還晉陽高祖崩丕自并州來赴救留洛陽尋詔
以丕為三老薨年八十二

辛紹先隴西狄道人父淵以義烈見稱西土世祖平涼
州紹先內徙家於晉陽明敏有識量與廣平游明根
范陽盧度世同郡李承等甚相友善先是蓼泉之戰
淵以所乘馬援李歆而身死於難紹先三年口不甘
味頭不櫛沐髮遂落盡至是常著垂裙皂帽起家中
書博士轉神部令下邳太守加寧朔將軍太和十三
年卒贈并州刺史晉陽公謚惠

孫僧化東莞人識星分案天占以言災異時有所中為

通直散騎常侍普泰中爾朱世隆惡其多言遂繫於
廷尉免官永熙中出帝召僧化與中散大夫孫安都
共撰兵法未就而帝入關遂罷元象中卒於晉陽

盧景裕字仲儒范陽涿人少聰敏專經為學河間邢摩
納與景裕從兄仲禮據鄉應西魏齊獻武王驛馬徵
景裕繫晉陽獄後舍之使教諸子在館十日一歸家
隨以鼎食興和中補齊王開府屬卒於晉陽齊獻武
王悼惜之景裕注易行於世

李鉉字寶鼎渤海南皮人九歲入學書急就篇月餘便
通以鄉里無可師遂與州里楊元懿河間宗惠振等
結侶詣大儒徐遵明受業居徐門下五年常稱高弟
二十三撰定孝經論語毛詩三禮義疏及三傳異同
周易義例合三十餘卷用心精苦曾三冬不畜枕每
至睡時假寐而已教授生徒多至數百後以鄉里寡
文籍來遊京師讀所未見書州舉秀才武定中李同
軌卒高祖令世祖在京妙簡碩學以教諸子世宗以

鉉應旨徵詣晉陽時中山石曜北平陽絢北海王晞
清河崔瞻廣平宋欽道及工書人韓毅同在東館師
友諸王鉉於講授之暇覽說文倉雅刪正六藝經注
中謬字名曰字辨顯祖受禪從駕還都為國子博士
詔以經授濟南甚見優禮卒還葬故郡太子致祭奠
之禮并使王人將送儒者榮之

崔子約清河人休子悛弟性孝長八尺餘姿神雋異潛
觀梁使劉孝儀宿從見者駭目武定中與兄子瞻俱

詣晉陽寄居佛寺子瞻長子約二歲每憑几相對儀
望俱華諸沙門竊窺之以為二天人也後為考功郎
卒

北齊

刁柔字子溫渤海人父整魏車騎將軍柔少好學綜習
經史尤留心禮儀性强記至於氏族內外多所諳悉
元象中隨例到晉陽高祖以為永安公府長流參軍
又令教授諸子天保時除中書舍人同修魏史卒

楊愔字遵彥弘農華陰人父津魏司空愔幼未嘗戲弄
庭前有柰樹實落地羣兒咸爭之愔頽然獨坐其季
父暉適入學館見之大相嗟異於宅內茂竹林邊別
葺一空令獨處其中常以銅盤具盛饌以飯之因督
勵諸子曰汝輩但如遵彥謹慎自得竹林別室銅盤
重肉之食正光中隨父之并州性既恬默又好山水
遂入晉陽西懸壟山讀書永安中津為并州刺史北
道大行臺愔隨之任出帝初還華陰營葬訖齋高祖

尋徵赴晉陽愔從兄幼卿以直言見誅取急就雁門
溫湯療疾郭秀素害其能因致書忌之曰高王欲送
卿於帝所仍勸其逃亡愔遂棄衣冠於水濱若自沉
者變易名姓自稱劉士安入嵩山與沙門曇謨徵等
屏居削迹又潛之光州因東入田橫嶼以講誦為業
海隅之士謂之劉先生太守王元景陰佑之神武知
愔存遣愔從兄寶猗齋書慰喻仍遣光州刺史奚思
業令搜訪以禮發遣神武見之悅除太原公開府司

馬轉長史天保中遷尚書右僕射尚太原長公主九年徙尚書令乾明元年二月以忠衛濟南為常山長廣二王所殺愔著詩賦表奏書論甚多沒後散失門人鳩集所得者萬餘言

李德林字公輔博陵安平人該博典故善屬文詞叢理暢齊天保中舉秀才擢甲科皇建初詔搜揚人物追赴晉陽撰思春賦一篇代稱典麗初授柱國郡公終懷州刺史卒謚文

盧公順范陽涿人胡后舅正山子早以文學見知武平
中符璽郎待詔文林館與博陵崔君洽隴西李師上
同志友善從駕晉陽寓居僧寺朝士謂康寺三少為
物論推許

隋

張虔威字元敬清河東武城人開皇初晉王廣出鎮并
州盛選僚佐以為刑獄叅軍累遷為屬與河內張衡
甚見禮重晉邸稱為二張大業中累加開府歷江都

贊治卒

崔躋字祖濬博陵安平人性至孝博學善屬文開皇中射策高第累授晉王記室叅軍起居舍人大業四年從駕幸汾陽宮登太行山詔問躋曰何處有羊腸坂對曰臣按漢書地理志上黨壺關縣有羊腸坂上曰不是又答曰臣按皇甫士安撰地書云太原北九十里
里有羊腸坂上曰是也因謂牛弘曰崔祖濬可謂問一知二終鷹揚長史

徐文遠洛州偃師人方正淳厚有儒者風開皇中官太學博士詔往并州為漢王諒講孝經禮記坐除名大業初復為博士公卿竇威等多從授學後為唐博士封東莞縣男

裴仁基河東人開皇中以拜儀同領漢王諒府親信諒將反仁基苦諫諒怒囚之諒敗累授光祿大夫後以謀劫王世充復立越王侗遇害

唐

張平高綏州膚施人隋末為鷹揚府校尉戍太原為高祖所識因參謀議為軍頭封蕭國公

夏侯端壽春人與高祖善大業中高祖帥師於河東討捕請端為副遂以御史監軍及義師起端在河東為吏所捕送長安高祖入關授秘書監加大將軍持節招慰河南節尤著終梓州刺史

李思行趙州人嘗避讐太原高祖令赴長安還具論機變深稱旨授左三統軍從破宋老生封安樂郡公卒

謚襄

李高遷岐州岐山人隋末客遊太原高祖常引之左右擒高君雅王威有力馬從平霍邑力戰功最

張後胤蘇州崑山人父中有儒學隋漢王諒出牧并州引為博士後胤從父在并州以學行見稱時高祖鎮太原引居賓館太宗就授春秋左氏傳義師之舉後胤首贊之貞觀中歷授國子祭酒散騎常侍卒贈禮部尚書

段志元齊州臨濟人父偃隋末為太原司法書佐志元從父客太原以剽果諸少年畏之甚為太宗所識義兵起募得千餘人授都督府軍頭從平霍邑絳郡皆為先鋒突擊桑顯和躡獲突厥通于稠桑封褒國公卒贈揚州都督謚曰忠壯

衛遼陽羨人少習詩書學弓劍有武畧二十七遊并汾間遇高祖始建義旗遼以勇藝進備行列洎擒竇建德遼時挾鎗劍前突後翼太宗頷而奇之天下既定

錄其功拜將軍宿衛以母老且病乞歸侍詞旨哀激
詔許之既而以孝敬睦閨門以然信居鄉里及卒邑
人懷其賢廟於荆溪之湄以平生弓甲懸東西廡下
歲時祠祭頗福其土馬

李白字太白興聖帝九世孫隋末徙西域神龍初還客
巴西白十歲通詩書既長隱岷山更客任城天寶初
南入會稽明皇召見懇求還山遂浮游四方至并州
嘗有憶舊遊寄譙郡元參軍詩又有太原早秋詩太

白在太原夏秋易季歲月滋深晉祠尤為亟遊地初
白遊并州見郭子儀竒之子儀嘗犯法白為救免永
王璘難作子儀請解官以贖後客當塗代宗以左拾
遺召而已卒

顏泉明常山太守杲卿子天寶十四載杲卿擒賊將高
邈何十年遣泉明與前正定令賈深內邱丞張通幽
手及翟萬德函賊將蔣欽奏首械二賊送長安至太
原節度王承業留之自上表獻之以為己功及杲卿

遇害真卿為蒲州刺史令泉明於河北訪求血屬購
還姑女暨父將吏來履謙已下妻子奴隸等三百餘
人悉以歸蒲州贍養久之隨其所詣而資送之又求
得父屍與履謙屍護還長安世服其志行仁義

馬炫汝州郟人燧兄至德中李光弼鎮太原署掌書記
常參軍謀光弼器馬歷連潤二州刺史以兵部尚書
致仕卒

崔從字子又清河武城人國子司業融曾孫少孤貧與

凡能偕隱太原山中力學會歲饑拾橡實以飯講誦
不輟怡然終日不出山巖如是者十年貞元初登進
士立朝稜稜有風望四為大鎮終檢校左僕射揚州
大都督府長史贈司空謚貞能亦授嶺南節度使

賈直言大歷中代父飲酖以孝義著聞劉悟鎮澤潞奏
置幕中悟纖微乖失直言盡理規箴潞軍圍監軍劉
承偕直言遽入責曰司空縱兵脅使者是欲效李司
空耶他日復為軍所指笑悟乃匿承偕於第以免穆

宗徵為諫議大夫悟拜章乞留復授檢校右庶子兼御史大夫依前充昭義軍行軍司馬劉從諫嘗見直言衣紫擁笏直言諫曰郎少年無襲山東態朝服可擅著耶悟卒大將劉武德等謀使鄰道表求襲位直言曰若從武德謀吾見劉氏為元濟矣乃自攝留後使從諫居喪初從諫惟鄆兵二千同謀直言既折之軍中遂安太和九年卒贈工部尚書

李師晦宗室子劉悟辟致幕府及從諫恣橫假事歸東

都潞澤平擢伊闕令

歐陽詹字行周泉州晉江人貞元八年進士客太原旅
懷呈薛十八侍御齊十二奉禮詩又陪太原鄭行軍
中丞登汾上閣詩見行周集

符璘字元亮令奇子降馬燧署為軍副詔拜特進封義
陽郡王既間父見害號絕泣血燧表其寃加檢校左
散騎常侍賜晉陽第一區祁田五十頃燧討李懷光
璘以五千兵先濟河與西師合從燧入朝為輔國大

將軍璘之降母匿里中獨免及田悅死詔迎至京賜宴別殿璘居環衛十三年卒贈越州都督

崔元翰齊國公日用從子第進士馬燧表為太原掌書記召拜知制誥訓辭溫厚有典誥風年七十餘卒

高銖字重權渤海人第進士署太原張弘靖幕府遷監察御史擢給事中以直諫著歷禮部尚書卒

高鏞字弱金銖弟第進士辟河東府參謀歷禮部侍郎知貢舉時稱得人轉吏部出為鄂岳觀察使卒

劉巨敖彭城人父承慶朔州刺史巨敖好讀老子莊周書為太原晉陽令再世宦北方樂其土俗遂著籍太原之陽曲曰自我為此邑人可也何必彭城乃昌裔之祖也

李璋贊皇人絳子第進士盧鈞鎮太原辟為從事大中末入朝仕至宣歙觀察使

李渥乾符初左拾遺鄭從謹鎮太原奏掌書記

王郜京兆萬年人義武節度處存子處存卒郜代為節

度累加太保同平章事光化三年為汴將張存敬所
攻攜族奔太原李克用累表授太尉天復初卒於晉
陽

後唐

盧質字子微河南人幼聰慧善屬文事唐為秘書郎後
游太原晉王以為河東節度掌書記質與張冰葉等
定議立莊宗為嗣莊宗即位欲以質為相質性疎逸
不欲任責固辭不拜拜太原尹北京留守晉天福中

卒年七十六諡文忠

趙玉薊州漁陽人客滄州依節度判官呂充劉守光破滄州叔充親屬盡戮之充子琦年十四玉負之以逃至太原變姓名丐衣食以給琦當是時燕趙之士以玉能存孤翕然稱之琦清泰中為端明殿學士玉已卒矣子文度入洛舉進士琦薦於主司馬喬孫擢甲科

劉贊魏州人父毗為縣令贊始就學衣以青布衫襦每

食則坻自肉食而別以蔬食食贊於牀下由是贊益力學舉進士明宗時拜秘書監為秦王從榮傳至府則從容諷諫率以正道退則杜門不交人事秦王敗論坐長流嵐州百姓清泰二年詔歸田里行至石會關卒

後晉

焦繼勳許州長社人少讀書有大志嘗謂人曰大丈夫當立功異域取萬戶侯豈能孜孜事筆硯哉遂棄其

業遊三晉間為輕俠晉祖鎮太原以儒服謁見晉祖
與語悅之留帳下天福初授皇城兼宮苑使累官宣
徽南院使漢授保大軍節度使宋太平興國三年卒
年七十八贈太尉

後周

李重進滄州人周太祖之甥福慶長公主之子也生於
太原後太祖令拜世宗定君臣分重進色黥伐淮南
吳人號黑駝大王仕至檢校太尉淮南道節度使宋

初起兵城陷縱火自焚

宋

錢俶字文德杭州臨安人本名弘俶以犯宣祖偏諱去
之漢乾祐初授吳越國王加尚書令天下兵馬都元
帥宋太平興國三年納土改封淮海國王四年四月
從征太原賜羊三百酒十斛俶小心謹恪每晨趨行
闕人未有至者俶必先至假寐以待旦上知之謂俶
曰卿已中年宜避風冷自今入謁不須太早也特輟

御前二大燭以賜之令先赴前頓上嘗賜從臣食於
中路頓并賜衛士羊臂臠卮酒觀其飲啖上見其雄
壯因顧倣進曰所謂如虎如貔如熊如羆者也會劉
繼元降上御連城臺誅軍中先亡命太原者顧謂倣
曰卿能保全一方以歸於我不致血刃深可嘉也倣
頓首謝倣中途被足疾車駕親臨問令太醫然艾以
灸病尋愈還京策勲宰相進擬加食邑萬戶實封千
戶上即改白麻倍加食邑二萬戶實封二千戶端拱

元年卒追封秦國王謚忠懿

李瓊字子玉幽州人幼好學涉獵史傳杖策詣太原唐莊宗募勇士應募與周祖等十人約為兄弟周祖與瓊情好尤密嘗過瓊見其危坐讀書因問所讀何書瓊曰此閩外春秋也周祖令讀之謂瓊曰兄當教我自是周祖出入常袖以自隨遇暇輒讀每問難瓊謂瓊為師及討河中乃解瓊兵籍令叅西征軍事累官安州防禦使民立碑頌德詔中書舍人竇儀撰文賜

之宋初召為太子賓客建隆三年致仕瓊信釋氏明
年四月八日詣佛寺遇疾歸至暮卒年七十三贈太
子少師

曹翰大名人周祖命隸世宗帳下從征高平叅預謀畫
宋初從征澤潞開寶二年從征太原為行營都壕砦
使太平興國四年從征太原為攻城南面都部署上
曰卿智勇無雙西北面非卿不能當築土山穿渠遂
平之官威塞軍節度卒贈太尉諡武毅

呂大鈞字和叔京兆藍田人大防弟學於張載中進士
乙科熙寧中韓絳宣撫陝西河東辟書寫機密文字
府罷移知侯官縣復為廊延從事卒載嘗歎其勇為
不可及云

李之儀字端叔滄州無棣人登第三十年乃從蘇軾於
定州徽宗初提舉河東常平坐為范純仁遺表作行
狀編管太平終朝請大夫之儀工尺牘軾謂入刀筆
三昧

金

張中孚字信甫其先自安定徙居張義堡父遠宋封慶國公中孚以父任補承節郎侍父守太原金宗翰圍太原其父戰歿中孚泣涕請迹父屍乃獨率部曲十餘人入金軍中竟得其尸以還後仕金至尚書左丞封崇王卒西人數萬為罷市

劉宣字伯宣其先潞人以出戍留居忻金末避地於陝後徙太原宣沉毅清介居家孝友幼喜讀書有經世

之志宣撫張德輝至河東見而器重之還朝薦為中書省掾官至集賢學士行臺御史中丞

元

齊喇西域人世居太原由中書驛史從賽音迪延齊為雲南行省幕官諸洞款附嘗頒詔於緬緬王稽顙仕至資善大夫雲南行中書省左丞大德四年卒

特點台扎拉台人太宗時嘗駐軍太原平陽土人德之皆為立祠

党志善陝西華陰人通五經尤精三命之術仕元至河
南中書省叅政元末避亂更名鼎新徙家榆次占籍
縣東陽里子文彥號白雲子博極羣書以教授為業
士多負笈從之

明

桂彥良名德偁以字行慈谿人元鄉貢進士洪武六年
徵詣公車後為晉王府右傅上親為文賜之彥良入
謝上曰江南大儒惟卿一人彥良至晉製格心圖獻

王後更官制改左長史請告歸卒

周天球江南太倉人有雋才詩與文俱為一時冠工書法能作大字小篆尤精性好遊芒鞋竹杖盤桓名山勝水通都大邑間王明甫桂子山莊故河東藩府別業也其西南當樓櫓處覆土作臺有天球振衣岡三大字其東北有卓九如作草亭其上玩晚山最勝天球小篆其湄曰夕佳王嘗侈為奇觀所著詩具見列

朝詩集

呂時字角東鄆縣人胡懷玉字楚貉河南人並以山人能詩寓居晉陽與王明甫孔文谷諸人相唱和臨清謝榛間喜裴邦奇亦時與焉

賈斌商河人為山西都司吏景泰三年八月都司令斌上疏言宦官其畧曰漢桓帝歸權宦官唐文宗受制家奴宋徽欽閤寺專國此皆前王覆轍後所當鑒者也臣採史傳所記直節盡忠之士名忠義集而恃寵蠹政之宦官可為鑒戒者附焉釐成四卷敬進闕庭乞

命工刊布之臣僚觀感而閹寺不得縱其奸宄之私
禮部以其言當乞垂鑒納不必刊行上報聞

張漢鍾祥人嘉靖二十三年為兵部左侍郎代翟暇總
督宣大山西時寇已出境乃命翁萬達總督宣大而
以漢專督畿輔河南山東諸軍漢請大將得專殺徧
裨總督亦得斬大將上不欲假臣下權兵部言漢老
邊事言皆可從姑報可言官劾漢剛愎遂械繫詔獄
謫戍鎮西衛居戍所二十年卒隆慶初贈兵部尚書

平陽府

周

遠罷字子蕩楚大夫靈王二十五年如晉蒞盟平公享之將出賦既醉叔向曰遠氏之有後於楚國也宜哉承君命不忘敏子蕩將知政矣敏以事君必其養民政其焉往

季孫行父魯大夫襄靈時兩使於晉後復使如晉魯宣伯使譖於郤犇請殺之晉執之舍於莒丘成公使子

叔聲伯請於晉準不許范文子曰季孫於魯相二公
矣妾不衣帛馬不食粟可不謂忠乎子叔嬰齊奉君
命無私謀國家不貳圖其身不忘其君信讒慝而棄
忠良若諸侯何乃許魯平赦行父歸

公孫歸父字子家魯大夫欲去三桓以張公室與宣公
謀而聘於晉欲以晉人去之公薨還及筮壇帷復命
於介既復命袒括髮即位哭三踊而出遂奔齊

晏嬰齊大夫靈王十九年晉人執衛侯嬰相齊侯如晉

私於叔向曰晉君宣其明德於諸侯恤其患而補其闕正其違而治其煩所以為盟主也今為臣執主若之何叔向以告晉人歸衛侯景王六年齊侯復使嬰請繼室於晉平公許之既成昏受禮叔向從之宴相與語齊晉之敝嬰曰此季世也吾弗知齊其為陳氏矣因言公棄其民而歸於陳氏之故叔向亦以晉公室之衰告之後胥如其言

公孫僑字子產一字子美鄭大夫靈王二十三年晉徵

朝於鄭鄭使僑於晉對之又三年鄭伐陳使僑獻捷於晉晉人問陳之罪僑對甚辯晉人不能詰乃受其獻景王二年相鄭伯如晉晉侯以魯喪未見僑使盡壞其館之垣士文伯讓之僑以盜賊公行宿見無時對趙武間之曰是吾罪也使文伯謝之平公見鄭伯有加禮厚其宴好而歸之叔向曰辭之不可已也是夫子產有辭諸侯賴之若之何其釋辭也明年平公有疾鄭使僑聘晉且問之時卜人言實沈臺駘為

崇史莫之知叔向以問僑僑曰昔高辛氏有二子伯
曰閼伯季曰實沈居於曠林不相能也日尋干戈以
相征討后帝不臧遷閼伯於商丘主辰商人是因故
辰為商星遷實沈於大夏主參唐人是因以服事夏
商其季世曰唐叔虞當武王邑姜方娠太叔夢帝謂
已余命而子曰虞將與之唐屬諸參而蕃育其子孫
及生有文在其手曰虞遂以命之及成王滅唐而封
太叔焉故參為晉星由是觀之則實沈參神也昔金

天氏有喬子曰昧為玄冥師生允格臺駘能業其官
宣汾洮障大澤以處太原帝用嘉之封諸汾川沈如
蓐黃實守其祀今晉主汾而滅之矣由是觀之則臺
駘汾神也抑此二者不及公身若公身則亦飲食哀
樂之事也僑間之君子有四時朝以聽政晝以訪問
夕以修令夜以安身於是乎節宣其氣勿使有所壅
閉湫底以露其體茲心不爽而昏亂百度今無乃壹
之則生疾矣僑又聞之內官不及同姓故志曰買妾

不知其姓則卜之違此二者古之所慎也男女辨姓禮之大司也今公內實有四姬焉其無乃是也乎若由是二者弗可為也已四姬有省猶可無則必生疾矣叔向稱善公聞之曰博物君子也重賄之十年復聘於晉時昭公有疾夢黃熊入於寢門韓起逆客問焉僑曰昔堯殛鯀於羽山其神化為黃熊以入於羽淵實為夏郊三代祀之晉為盟主其或者未之祀也乎起祀夏郊晉侯有間賜僑以莒之二方鼎先是公

賜州田於公孫段至是僑為其子豐施歸之於起僑
數聘晉與叔向善叔向嘗問鄭政與其大夫僑對之
後皆如其言及鄭鑄刑書叔向遺書諫之僑復書曰
吾以救世也既不承命敢忘大惠其獻陳捷於晉也
孔子嘗稱之曰志有之言以足志文以足言不言誰
知其志言之無文行之不遠晉為伯鄭入陳非文辭
不為功慎辭哉

游吉鄭大夫靈王二十七年如晉告朝楚少姜之奠墜

虎祁成咸至晉送賀敬王二年相鄭伯如晉見范獻子
獻子以王室問對曰老夫其國家不能恤敢及王室抑
人亦有言曰嫠不恤其緯而憂宗周之隕為將及焉今
王室實蠢蠢焉吾小國懼矣然大國之憂也吾儕何知
焉吾子其早圖之獻子懼而與宣子圖之乃徵會於諸
侯四年夏遂會於黃父令輸王粟具戍人曰明年將納
王趙簡子見吉問揖讓周旋之禮焉對曰是儀也非禮
也夫禮天之經也地之義也民之行也天地之經而民

是則之故能曲直以赴於禮者謂之成人簡子曰鞅也
請終身守此言也頃公之葬鄭復使吉弔且送葬士
景伯詰其無貳之故吉對以禮有豐省晉不能詰十
四年返自召陵吉未至而卒簡子為之臨甚哀曰黃
父之會夫子語我九言曰無始亂無怙富無恃寵無
違同無傲禮無驕能無復怒無謀非德無犯非義

季札吳公子景王元年歷聘諸國適晉說趙文子韓宣
子魏獻子曰晉國其萃於三族乎說叔向將行曰吾

子勉之公侈而多良大夫皆富政將在家吾子好直
必思自免於難

叔弓魯大夫景王五年如晉平公使郊勞辭曰寡君使
弓來繼舊好固曰女無敢為賓徹命於執事敝邑弘
矣敢辱郊使請辭致館辭曰寡君命下臣來繼舊好
好合使成臣之祿也敢辱大館叔向曰子叔子知禮
哉忠信禮之器也卑讓禮之宗也辭不忘國忠信也
先國後己卑讓也詩曰敬慎威儀以近有德夫子近

德矣十一年復如晉賀虎祁

叔孫豹魯大夫厲平之世凡五使於晉賦詩應對咸適
事宜晉人稱之范宣子嘗問不朽於豹以范氏先世為
言豹曰曰此謂世祿非不朽也豹聞之太上有立德
其次有立功其次有立言雖久不廢此之謂不朽若
夫保姓受氏以守宗祊世不絕祀無國無之祿之大
者不可謂不朽

子貢衛人齊田常欲伐魯子貢請行孔子許之遂行至

齊說田常伐吳田常許之使子貢南見吳王說使救
魯伐齊吳以越為憂子貢請東見越王王令出兵以
從還報吳王於是吳王乃遂發九郡兵伐齊子貢由
吳之晉謂晉君曰臣聞之慮不先定不可以應卒兵
不先辦不可以勝敵今夫齊與吳將戰彼戰而不勝
越亂之必矣與齊戰而勝必以其兵臨晉晉君大恐
曰為之奈何子貢曰修兵休卒以待之晉君許諾子
貢去而吳王勝齊於艾陵以兵臨晉晉人擊之吳師

敗越遂襲吳

濕叔周杜伯子宣王殺杜伯濕叔奔晉生士為為獻公
司徒世為晉卿

樗里子名疾秦惠王之弟也滑稽多智號智囊惠王八
年將而伐曲沃盡出其人取其城池二十五年為將
伐趙虜趙將軍莊豹拔藺武王立為右丞相昭王元
年將而伐蒲蒲守請胡衍說樗里子勿攻樗里子善
之遂解蒲而去還擊皮氏皮氏未降又去七年卒

晉

劉毅東萊人孝而有節居平陽太守杜恕請為功曹時語曰但聞劉功曹不聞杜府君晉武時累官尚書僕射子噉正直有父風官至左丞

北魏

酈暉字幼渠范陽涿鹿人範弟神虎子也好學有文才尤長吏幹正光中刺史裴延儁舉秀才射策高第後延儁為行臺尚書引為行臺郎以招撫有稱及延儁

解還行臺長孫稚又引為行臺郎加征虜將軍惲頗兼武用常以功名自許每進計於稚多見納用以功賞魏昌縣開國子後與唐州刺史崔元珍固守平陽武泰中爾朱榮稱兵赴洛惲與元珍不從其命為榮行臺郎中樊子鵠所攻城陷被害時年三十六世咸痛惜之所作文章行於世

北周

宇文慶字神慶河南洛陽人累授驃騎大將軍建德五

年從伐齊拔晉州其後齊師大至慶與宇文憲輕騎而覘卒與賊遇為所窘憲挺身遁慶退據汾橋衆賊爭進慶引弓射之所中人馬必倒賊乃少却及破齊拔高壁克并州功並居最詔封汝南郡公開皇初拜武衛將軍上柱國涼州總管卒

唐

姜寶誼秦州上邽人大業末鷹揚郎將領府兵從高祖督盜太原及起兵授左統軍下西河霍邑武德初封

永安縣公歷右武衛大將軍劉武周數遣黃子英盜
雀鼠谷命寶誼擊之遇伏被執尋亡歸與裴寂拒宋
金剛戰汾州寂走寶誼復為所擒上聞曰彼烈士必
不肯下賊死矣賜其家物千段米三百斛果謀還被
害且死西向大呼曰臣無狀負陛下賊平詔迎其柩
贈左衛大將軍謚曰剛

姜暮上邽人從唐高祖平霍邑絳郡上言多見嘉納後
為參軍民畏其法而懷其仁比去位隱於霍之石鼻

谷

員半千字榮期齊州全節人其先本彭城劉氏十世祖
凝之事宋起部郎及齊受禪奔元魏以忠烈自比伍
員因自姓員半千始名餘慶羈州通書史客晉州州
舉童子房玄齡異之對詔高第己能講易老子長事
王義方以邁秀見賞義方嘗曰五百歲一賢者生子
宜當之因改今名凡舉八科皆中咸亨中上書自陳
臣家貲不滿千錢有田三十畝粟五十石聞陛下封

神岳舉豪英故鬻錢走京師朝廷九品無葭蓍親行
年三十懷志潔操未蒙一官不能陳力歸報天子陛
下何惜玉陛方寸地不使臣披露肝膽乎俄舉岳牧
對策擢高第使吐蕃將行武后曰久聞爾名謂為古
人乃在朝邪境外事不足行宜留待制即詔入閣供
奉為弘文館直學士又待制顯福門下累封平原郡
公半千事五君有清白節年老不衰樂山水自放開
元九年遊堯山沮水間愛其地遂定居卒年九十四

即葬焉

褚無量字弘度杭州鹽官人精禮及司馬史記擢明經
除左散騎常侍兼國子祭酒開元五年東巡狩上疏
請所過名山大川卽陵墳衍古帝王賢臣在祀典者
並詔致祭上納之卽詔無量祠堯平陽在所刺史參
獻七年卒贈禮部尚書

李拯字昌時隴西人咸通中進士累佐府幕黃巢亂避
地平陽後為考功郎中知制誥時襄王煊之難拯嘗

退朝望南山而吟吟已泣下襄王敗拯為亂兵所殺
妻盧氏刃斷一臂死

李餘福京兆人叅政昭德之孫為唐監察御史適丁唐
末致仕閒居昭宗乾寧四年挈家東行至晉地越陵
山東紫胡口詢其地父老云東南曰翼城唐叔始封
之都也西北曰壽城鄭太子分封之域也餘福遂卜
地焉其後元弼明經中選知曲沃縣事

楊宗雁門人唐昭宗天祐中仕至大司空以唐末兵起

遂卜地於翼石鄭莊其後子孫楊璘輩累代貴顯

元

張從諫浙江寧波人元學士元亡遂遠遁佯狂乞於翼
市後以詩贈學諭學諭憫其寒令諸生遺之以布從
諫曰何相輕如此古之却衣而斃者何人哉遂索詩
反其布卒葬漏澤園

明

毛士龍字伯高宜興人萬歷四十一年進士為刑科給

事中內豎劉朝田詔劉進忠盜宮中贖下獄魏忠賢傳旨貸死下刑科士龍抄叅者三忠賢及諸奄銜刺骨忠賢憾張后誣為死囚孫二所出土龍請究治妖言并主使忠賢益怒士龍劾順天府丞邵輔忠輔忠反劾之因削籍忠賢又令私人張訥劾之遣戍平陽衛士龍知忠賢必殺己夜中穴墻遁其妾不知謂有司殺之披髮號泣於道而忠賢適誅朝士為士龍稱寃詔赦罪復官晉左僉都御史病歸

國朝

王國寧翼城典史明輔子姜逆之亂與知縣何斯盛同

戰死

潞安府

漢

祝公道河南人建安中郭援破絳邑捕得邑長賈逵囚
於壺關閉著土窖中以車輪蓋上使人固守方將殺
之逵從窖中謂守者曰此間無健兒耶而當使義士

金史卷一百四十七
卷一百四十七
死此中乎時公道游壺關與逵非故人而適聞其言
憐其守正危阨乃夜盜往引出折械遣去不語名姓
援破逵乃知前出己者為公道後公道坐他事逵救
之力不能解為之改服焉

仲長統字公理山陽高平人少好學博涉書記瞻於文
辭年二十餘游學青徐并冀之間與交友者多異之
并州刺史高幹袁紹甥也素貴有名招致四方遊士
士多歸附統過幹幹善待遇訪以當時之事統謂幹

曰君有雄志而無雄才好士而不能擇人所以為君
深戒也幹雅自多不納其言統遂去之無幾幹敗并
冀之士皆以是異統統性倣儻敢直言後叅丞相曹
操軍事每論說古今及時俗行事恒發憤歎息因著
論名曰昌言凡三十四篇十餘萬言卒時年四十一
友人東海繆襲常稱統文章足繼西京董賈劉揚

張璠字子明鉅鹿人學兼內外袁紹前後辟命不應移
居上黨并州牧高幹表除樂平令不就徙適常山門

徒數百人卒年一百五歲

常林字伯槐河內溫人少單貧自非手力不取之於人
性好學為諸生帶經耕鋤其妻常自餽餉之雖在田
野相敬如賓避地上黨耕種山阿當時旱蝗林獨豐
收盡呼比隣升斗分之依故河間太守陳延璧陳馮
二姓舊族冠冕林率其宗族為之策謀張楊圍壁六
十餘日卒獲全并州刺史高幹表為騎都尉不受後
刺史梁習薦州界名士林及楊俊王凌王象荀緯皆

以為縣長林宰南和治化有聲官至太常封高陽鄉侯卒謚曰貞

晉

馮和信都人永嘉之亂避地上黨子安雄武有器量慕容永舉為將軍

北魏

元畧字雋興中山王英第四子熙弟也累遷給事黃門侍郎清河王懌死後元叉黜畧為懷朔鎮副將未及

赴任會熙起兵於相州與畧書來去尋值熙敗畧遂
潛行自託舊識河內司馬始賓始賓便為荻筏夜與
畧俱渡盟津詣上黨屯留縣粟法光法光素敦信義
忻而納之畧舊識刁雙時為西河太守畧復歸之停
止經年雙乃令從子昌送畧潛遁江左後肅宗徵畧
梁送至京師詔光祿大夫刁雙境首勞問封義陽王
其司馬始賓除給事中領直後粟法光本縣令刁昌
東平太守刁雙西兖州刺史凡畧所至一餐一宿無

不虛賞累遷大將軍尚書令

唐

宋舉西河人唐起義兵舉為將有斬將塞旗之功授儀
同三司不受心慕玄虛退隱於潞卒莫城西二里有
墓誌

馮伉魏州元城人第五經貞元中潞澤李抱貞卒伉以
膳部員外郎充弔贈使抱貞男遺伉弔數百匹不納
又專送京師伉因表奏固請不受屬醴泉令闕上謂

宰臣曰前使潞澤不受財帛者此人必有清政遂授
伉歷拜左散騎常侍卒

符令竒沂州臨沂人初為盧龍軍裨將挈子璘奔昭義
節度使薛嵩署為軍副後田承嗣盜其地引為右職
田悅拒命馬燧討之令竒密謂璘曰吾閱世事多矣
自安史干紀無噍類吾觀田氏覆亡無時汝能委質
朝廷為唐忠臣吾亦名揚後世矣璘泣曰悅忍人也
近禍可畏令竒曰今王師四合吾屬俎中醢兒今行

吾死不朽不行吾亦死屍壘逆地云何璘俯泣不能
對及悅使璘護送齋將李納璘與父啣臂別與三子
同出以三百騎降燧悅引令竒切讓令竒罵曰爾忘
義旦夕死吾教予以順殺身庸何悔鈞死愈爾遠矣
遂遇害臨刑色不變年七十九贈戶部尚書

孔戡字君勝巢父從子第進士以大理評事佐昭義李
長榮節度府盧從史代之留為書記從史與王承宗
田緒陰相連結戡始陰爭不從後秉筆至不軌之言

極諫以為不可從史始若受其言後益恣因謝病歸揚州李吉甫表置幕府戡未應從史曰是欲舍我而從人耶即誣以罪奏三上詔分司東都卒從史敗追贈司勳員外郎

李回字昭度新興王德良後第進士會昌中累拜刑部侍郎兼御史中丞時方伐劉稹武宗慮河朔列鎮陰相締以撓兵事李德裕薦回持節往諭何弘敬王元逵聽命又張仲武以幽州兵攻回鶻與劉沔不協回

至諭以大義仲武釋然即合太原軍攻潞復以回為
使督戰攻潞至蒲東王宰石雄橐韃謁道左回不弛
行顧左右呼直史責破賊限牒宰等震恐期六旬取
潞否則死之未及期二日賊平進中書侍郎同平章
事坐德裕貶終撫州長史

宋

黃庭堅字魯直分寧人嘗寓襄垣有像贊及薄酒醜婦
歌石刻士人至今寶重之

元

張雄飛字鵬舉琅琊臨沂人父琮仕金守盱眙徙居許州雄飛幼失母琮妻李氏養之元兵屠許惟工匠得免有田姓者琮故吏也能作弓以雄飛及李氏為家人由是獲全徙朔方雄飛時方十歲至霍州李欲逃恐其累己雄飛知之頃刻不去左右李乃變服與俱遷寓潞州雄飛既長往師前進士王寶英於趙城金亡雄飛不知父所在往來澤潞求之十餘年嘗客食

僧舍後入燕廉希憲薦之處士羅英嘗言於世祖曰
張雄飛真公輔器

高鵬字彥解渤海人祖彛徙居上黨父守忠為千戶戰
沒於黃州鵬事世祖備宿衛監作東宮錫金幣廩馬
賜名寶喇仕至河南路宣慰使卒年五十三

明

張從恕東光人父仲素仕元為長沙通判從恕亦為元
西寧總管元亡東歸寓居壺關遂為壺關人子謙舉

茂才

呂時臣字中父鄆縣人工詩避讐言遠遊歷齊梁燕趙間
十年客食諸王門下晚客潘潘宣王禮之亞於謝榛
年七十客死涉縣魯府中立序其詩曰山人鶴骨癯
癯若出衣表貞介廉潔不妄交不苟取故為諸王侯
所重

謝榛臨清人眇一目年十六作樂府商調少年爭歌之
已折節讀書刻意為歌詩西游彰德趙康王厚禮焉

李攀龍王世貞等結詩社於京師榛為長游道日廣
潘晉諸王爭延致潘府王將軍中尉多工詩繇榛啟
之也榛走塞下交孔文谷王行甫諸公萬厯元年冬
復游彰德趙穆王尤敬禮之

夏言上饒人進士嘉靖中以兵科給事中督剿青羊山
叛寇陳卿一鼓焚其巢穴盜自縛以降奏請置邑以
安輯遺了天子嘉之命其邑曰平順累官大學士為
嚴嵩所害嵩敗後贈卹謚肅愍

汾州府

周

卜商字子夏衛人

鄭康成曰
溫國卜商

孔子弟子孔子既沒子夏

居西河教授三百人為魏文侯師魏文侯問於子夏

曰吾端冕而聽古樂則惟恐卧聽鄭魏之音則不知

倦敢問古樂之如彼何也新樂之如此何也子夏對

曰今夫古樂進旅退旅和正以廣弦匏笙簧會守拊

鼓始奏以文復亂以武治亂以相訊疾以雅君子於

是語於是道古修身及家平均天下此古樂之發也
今夫新樂進俯退俯姦聲以濫溺而不止及優侏儻
獲雜子女不知父子樂終不可以語不可以道古此
新樂之發也今君之所問者樂也所好者音也夫樂
者與音相近而不同文侯曰敢問何如子夏對曰夫
古者天地順而四時當民有德而五穀昌疾疢不作
而無妖祥此之謂大當然後聖人作為父子君臣以
為紀綱紀綱既正天下大定天下大定然後正六律

和五聲弦歌詩頌此之謂德音德音之謂樂詩云猗其德音其德克明克明克類克長克君王此大邦克順克比比于文王其德靡悔既受帝祉施于孫子此之謂也今君之所好者其溺音乎文侯曰敢問溺音何從出也子夏對曰鄭音好濫淫志宋音燕女溺志衛音趨數煩志齊音敖辟驕志此四者皆淫於色而害其德是以祭祀弗用也詩云肅雝和鳴先祖是聽夫肅肅敬也雝雝和也夫敬以和何事不行為人君

者謹其所好惡而已矣君好之則臣為之上行之則
民從之詩云誘民孔易此之謂也然後聖人作為鞀
鼓控揭壎箎此六者德音之音也然後鐘磬等瑟以
和之干戚旄狄以舞之此所以祭先王之廟也所以
獻酬醕酢也所以官序貴賤各得其宜也所以示後
世有尊卑長幼之序也儀禮有祭服傳一篇鄭康成
謂論語為仲弓子夏撰漢徐防曰詩書禮樂定自孔
子發明章句始于子夏當設教西河田子方段干木

暨公羊高穀梁赤胥子夏門人云史記索隱子夏文學著於四科序詩傳易又孔子以春秋屬商又傳禮著在禮志唐貞觀二年從祀開元封魏侯宋進封河東公度宗改封魏國公

高豎齊高止之子景王元年奔晉晉人城絛而寘旃

漢

徐穉字孺子豫章南昌人家貧常自耕稼非其力不食舉有道家拜太原太守不就穉嘗到江夏設雞酒薄

祭太尉黃瓊不告姓名時名士郭林宗等數十人會
墓間之疑其禩也乃選能言語生茅容輕騎追之及
於塗容為設飯臨訣去謂容曰為我謝郭林宗大樹
將顛非一繩所維何為栖栖不遑寧處及林宗有母
憂禩往弔之置生芻一束於廬前而去衆怪不知其
故林宗曰此必南州高士徐孺子也詩不云乎生芻
一束其人如玉吾無德以堪之靈帝初欲蒲輪聘禩
會卒時年七十二

郭巨河南彰德人居孝義永安性至孝竭力養母慮幼子分母食欲埋之掘坎得金人以為天賜云墓在縣東北五里清義村

後唐

呂琦字輝山幽州安次人父充為橫海軍節度劉守文謀主劉守光族充家琦年十五充故客趙玉給其監者曰此吾弟也乃縱之玉與琦得俱走琦足弱玉負之而行琦美風儀重節概少喪其家游學汾晉之間

唐莊宗鎮太原以為代州軍事推官後拜端明殿學士晉天福中卒趙玉仕至職方員外郎琦事之如父玉疾親嘗藥扶持及卒為其家主辦喪葬琦子餘慶端

宋

陳搏亳州真源人舉進士不第隱華山周世宗時嘗召至汴宋太平興國中兩入朝命為諫議大夫不受還隱華山又嘗居石州北掃場街面嘗不洗洗輒雨後

仙蛻於州之鳳山有仙塚在

邵雍字堯夫其先范陽人父古徙衡漳又徙共城雍游
河南葬其親伊水上遂為河南人雍少時自雄其才
慷慨欲樹功名於書無所不讀始為學即堅苦刻勵
寒不爐暑不扇夜不就席者數年已而歎曰昔人尚
友千古而吾獨未及四方於是始踰河汾乃涉淮漢
周流齊魯宋鄭之墟久之幡然來歸曰道在是矣遂
不復出熙寧十年卒贈秘書省著作郎元祐中賜謚

康節

金

杜瑛字文玉其先霸州信安人長七尺美鬚髯氣貌魁
傑時兵後文物凋喪瑛搜訪諸書盡讀之究其指趣
間闕轉徙教授汾晉間中書鉅祜珪開府於相瑛赴
其聘遂家焉

元

陳資壽錦州永樂人任寧鄉縣適元末兵燹之餘剿捕

羣寇綏輯人民歷官至昭毅大將軍後遂占籍於此
二子政致胥榮顯

明

張紳字佩之號雲溪浙江仁和人家汾陽性聰慧涉獵
書史善畫嗜酒客游燕秦間與司馬彭辛菴修撰康
對山相友善倦遊還與劉文安龍為方外交卒年六
十九文安誌其墓

鄭柏齡自號鶴菴山人家本吳會明初占籍汾陽先世

累為慶成永和二藩王師柏齡肆力詩古文以寄其
蕭散簡放之韻子觀孫奇胥選拔

大同府

漢

陳平陽武戶牖鄉人少好讀書治黃帝老子之術歸漢
為都尉六年封戶牖侯七年從擊韓王信於代至平
城白登被圍七日不得食高帝用平奇計使閼氏為
解圍得開高帝既出其計秘世莫得聞更封為曲逆

侯十年從擊陳豨惠帝六年為左丞相後與太尉周勃謀誅諸呂立文帝文帝二年卒謚曰獻侯

夏侯嬰沛人高祖以嬰為太僕常奉車賜爵昭平侯更食汝陰剖符世世勿絕從擊代至武泉雲中益食千戶從擊韓王信軍胡騎晉陽旁大破之追北至平城為胡所圍七日不得通高帝使使厚遺閼氏冒頓乃開其圍一角高帝出欲馳嬰固徐行弩皆持滿外嚮卒以得脫益食嬰細陽千戶從擊胡騎勾注北大破

之擊胡騎平城南三陷陳功為多賜所奪邑五百戶
從擊陳豨陷陳却敵益邑千戶定食汝陰六千九百
戶文帝八年卒謚曰文侯

酈商高陽人以所將四千人屬沛公賜爵信成君從擊
臧荼以功遷右丞相賜爵列侯食邑涿郡五千戶別
定上谷因攻代受趙相國印與絳侯等定代郡雁門
得代丞相程縱守相郭同將軍以下至六百石十九
人後以右丞相擊陳豨殘東垣更封曲周侯

馬援字文淵扶風茂陵人其先趙奢為趙將號曰馬服君子孫因為氏援少有大志建武十七年拜伏波將軍擊交趾斬徵側徵貳封新息侯二十四年烏桓寇扶風援出屯襄國明年秋將三千騎出高柳行雁門代郡上谷障塞烏桓侯者見漢軍至遂散去援無所得而還二十四年征五溪蠻病卒建初三年追謚曰忠成侯

楊政字子行京兆人少好學從代郡范升受梁丘易善

說經書京師為之語曰說經鏗鏗楊子行教授數百
人范升嘗為出婦所告坐繫獄政乃肉袒以箭貫耳
抱升子潛伏道旁候車駕而持章叩頭大言曰范升
三娶唯有一子今適三歲孤子可哀武騎虎賁懼驚
乘輿舉弓射之猶不肯去旄頭又以戟叉政傷脅政
猶不退哀泣辭請有感帝心詔曰乞楊生師即尺一
出升政由是顯名建初中官至左中郎將

北魏

常爽字仕明河內溫人魏太常卿林六世孫也祖仕秦
居涼州爽少而聰敏嚴正有志概雖家人僮隸未嘗
見其寬誕之容篤志好學博聞強識明習緯候五經
百家多所研綜州郡禮命皆不就世祖西征涼土爽
與兄仕國歸歎軍門世祖嘉之賜爽為六品拜宣威
將軍是時戎車屢駕征伐為事貴遊子弟未遑學術
爽置館溫水之右教授門徒七百餘人京師學業翕
然復興爽立訓甚有勸罰之科弟子事之若嚴君焉

尚書左僕射元贊平原太守司馬貞安著作郎程靈
虬皆是爽教所就崔浩高允並稱爽之嚴教獎勵有
方允曰文翁柔勝先生剛克立教雖殊成人一也其
為通識歎服如此因教授之暇述六經畧注以廣制
作甚有條貫其書行於世爽不事王侯獨守閒靜講
經肆典二十餘年時人號為儒林先生年六十三卒
於家

江強字文威陳留濟陽人高祖瓊善蟲篆訓詁徙居涼

土世傳家業太延五年涼州平強內徙代京上書三十餘法各有體例又獻經史諸子千餘卷拜中書博士卒子紹興掌國史二十餘年孫式篆體尤工撰古今文字四十卷

陰仲達武威姑臧人少以文學知名涼州平內徙代都司徒崔浩啟仲達與段承根云二人俱涼土才華同修國史除秘書著作郎卒

房靈建房靈賓清河繹幕人靈賓文藻不如靈建而辯

悟過之昏以才名見稱靈建宋渤海太守靈賓冀州
治中後魏平青冀昏入代為平齊民雖流漂屯圯操
尚卓然並卒於平齊

崔道固字季堅清河東武城人母卑賤父輯曰此兒姿
識或能興大門戶為宋冀州刺史鎮歷城慕容白曜
南伐道固面縛白曜送赴代都乃徙齊土望共道固
守城者數百家於桑乾立平齊郡於平城西北北新
城以道固為太守賜爵臨淄子尋徙居京城西南二

百餘里舊陰館之西延興中卒子景徽襲

房景伯字長暉清河繹幕人祖元慶為沈文秀所害父
愛親隨例內徙為平齊民以父非命䟽服終身景伯
生於桑乾少喪父以孝聞家貧傭書自給養母甚謹
尚書盧淵稱之於李冲冲時典選拔為奉朝請司空
祭酒後行齊州事除清河太守號循吏仕至司空長
史以母疾去官母亡病積年不愈卒景伯涉獵經史
諸弟宗之如事嚴親鄉里語曰有義有禮房家兄弟

廷尉卿崔先韶好標榜人物無所推尚每云景伯有士大夫之行業

房景先字光胄景伯弟幼孤貧無資從師其母自授毛詩曲禮年十二請其母曰豈可使兄傭賃以供景先也請自求衣然後就學母哀其小不許苦請從之遂得一羊裘忻然自足晝則樵蘇夜誦經史自是精勤遂大通贍太和中例得還鄉郡辟功曹州舉秀才解褐太學博士太常劉芳侍中崔光歎其精博光奏兼

著作佐郎修國史侍中穆紹啟撰世宗起居注後為
東義陽城行臺卒謚文景先沈敏方正事兄恭謹作
五經疑問百餘篇其言該典行於時弟景遠字叔遐
事二兄至謹撫兄孤甚篤重然諾好施與益州啟昭
武府功曹參軍以母老不應

趙琰字叔起天水人初苻氏亂琰為乳母攜奔壽春年
十四乃歸代都孝心色養飪熟之節必親調之皇興
中京師歲儉婢簡粟糶之琰遇見切責敕留輕糝初

為兗州司馬轉圍城鎮副將還京為淮南王他府長
史時禁制甚嚴不聽越關奠於舊兆琰積三十餘年
不得葬二親及蒸嘗拜獻未曾不嬰慕卒事每於時
節不受子孫慶賀年踰耳順而孝思彌篤年八十卒
遷都洛陽子應等乃還鄉葬焉

傅永字修期清河人年二十餘有友人與之書而不能
答請叔父洪仲洪仲深讓之而不為報永乃發憤讀書
涉獵經史兼有才幹為宋冀州刺史崔道固城局

參軍與道固俱入魏為平齊百姓晚為奉禮郎王肅
平南長史一月獻再捷策拜安遠將軍員丘縣男帝
每歎曰上馬能擊賊下馬作露布惟傳修期耳後為
南兗州刺史年踰八十猶能馳射還京拜光祿大夫
卒葬東清河

崔光本名孝伯字長仁高祖賜名焉東清河鄆人也父
靈延宋龍驤將軍長唐太守三齊平光年十七隨父
徙代家貧好學晝耕夜誦傭書以養父母太和六年

拜中書博士轉著作郎參撰國書甚為高祖所知待
嘗曰孝伯之才浩浩如黃河東注固今日之文宗也
累遷中書監世宗延昌二年敕以光為肅宗傳肅宗
南面再拜光北面立不答拜肅宗立封博平縣開國
公食邑二千戶遷車騎大將軍儀同三司晉司徒公
太保固辭正光四年卒贈太傅謚文宣肅宗祖喪建
春門外望輒哀感儒者榮之光撰百三郡國詩百三
卷詩賦銘贊誄頌表啟數百篇五十餘卷子勵字彥

德器學才德有父風與從兄鴻俱有名於世侍父疾衣不解帶孝昌元年襲父爵建義初遇害河陰贈侍中衛將軍青州長史

崔長文字景翰光從祖弟少亦徙於代都聰敏有學識太和中除奉朝請累遷高陽王諮議叅軍永安中還家卒謚貞

高聰字僧智本渤海蓼人曾祖軌徙劇縣父法昂宋車騎將軍王元謨甥也官至員外郎聰少育於祖母王

魏克東陽徙入牛城與蔣少遊為雲中兵戶窘困無所不至族祖允視之若孫大加調給聰涉獵經史頗有文才允素稱其美言於朝云青州蔣少遊與從孫僧智雖為孤弱然皆有文情由是與少遊同入中書博士稍為高祖知遇聰嘗徙平州行屆瀛州屬刺史王質獲白兔託聰為表高祖見表顧王肅曰在下那得復有此才而今朕不知也肅曰比高聰北徙此文或其所製高祖悟曰必應然也何應更有此輩聰附

趙修如皓以疎宗曲事高肇仕至光祿大夫卒謚獻
集二十卷

任延敬廣寧人伯父桃太和初為雲中軍將延敬隨之
因家焉初隨葛榮以先降拜鎮遠將軍賜爵西河縣
公後隨高祖建義太昌初累轉尚書左僕射位望既
重能以寬和接物人士稱之及斛斯椿讞發延敬棄
家北走至河北郡率土民據之以待高祖天平後再
為侍中卒贈太保

元羽字叔翻顯祖第五子太和九年封廣陵王高祖將南討遣羽持節安撫六鎮發其突騎夷人寧悅車駕既發詔羽與太尉元丕留守京師並加使持節詔丕羽曰留守非賧莫可太尉年尊德重位總阿衡羽朕之懿弟溫柔明斷故使二人留守京邑授以二節賞罰在手其祇允成憲以稱朕心丕對曰謹以死奉詔羽對曰太尉宜專節度臣但可副貳而已高祖曰老者之智少者之決何得辭也高祖友愛諸弟不忍早

分詔羽從至雁門乃令歸賜如意以表心遷京之後
北蕃人夷多有未悟羽鎮撫代京內外肅然高祖嘉
之後以留守功增邑五百戶進號車騎大將軍卒謚
惠

元澄字道鎮任城王雲之子恭宗之孫也少而好學襲
封累授尚書令兼左僕射高祖幸洛陽定遷都策詔
曰遷移之旨必須訪衆當遣任城馳驛向代問彼百
司論擇可否近日論草卦今真所謂草也王其勉之

既至代都衆聞遷詔莫不驚駭澄援引今古徐以曉
之衆乃開伏澄遂南馳還報會車駕於滑臺高祖大
悅曰若非任城朕事業不得就也既而恒州刺史穆
泰在州謀反推朔州刺史陽平王頤為主頤表其狀
高祖召澄入見凝閒堂曰適得陽平表曰穆泰謀為
不軌招誘宗室脫或必然遷京甫爾北人戀舊南北
紛擾朕洛陽不立也此事非任城不辦可為我力疾
向北如其弱也直往擒剪若其勢彊可承制發并肆

兵以殄之雖知王患既是國家大事不容辭也澄曰
秦等愚惑正戀本為此非有遠圖臣誠怯弱不憚是
輩雖復愚悞謹當罄盡心力繼之以死願陛下勿憂
高祖笑曰得任城此行朕復何憂也遂授節銅虎竹
使符御仗左右仍行恒州事行達雁門太守夜告秦
已握衆西就陽平城下聚結惟見弓仗澄聞便速進
時右丞孟斌曰事不可量須依敕召并肆兵然後徐
動澄曰秦既構逆應據堅城而更迎陽平度其所為

似當勢弱秦既不相拒無故發兵非宜也但速往鎮之民心自定遂倍道兼行出其不意又遣治書侍御史李煥先赴至即擒秦民情怡然窮其黨與罪人皆得鉅鹿公陸叡安樂侯元隆等百餘人皆獄禁具狀表聞高祖覽表大悅召集公卿以表示之曰我任城可謂社稷臣也尋其罪案正復臯陶斷獄豈能過之顧謂咸陽王等曰汝等脫當其處不能辨此車駕尋幸平城勞澄曰任城此行深副遠寄對曰陛下威靈

遠被罪人無所逃刑臣何勞之有引見逆徒無一人稱枉時人莫不歎之高祖顧謂左右曰昔仲尼云聽訟吾猶人也必也使無訟乎然聖人之聽訟殆非常人所匹也無訟今日見之矣後累遷司徒公神龜二年薨贈假黃鉞都督中外諸軍事太傅領太尉公備九錫依晉大司馬齊王攸故事謚文宣

李煥趙郡人有幹用與麗道元俱為李彪所知恒州刺史穆泰據代都潛謀煥以書侍御史與任城王澄推

究之煥先驅至州宣旨曉諭乃執秦等景明初迎接
裴叔業賜爵容城伯卒謚明

北周

趙昶字長舒天水南安人曾祖襄家於代昶弱冠以材
力聞孝昌中起家拜都督周太祖平弘農擢為相府
典籤汾州叛再遣昶慰勞之皆知其虛實及大軍往
討昶為先驅遂破之拜武州刺史車騎大將軍儀同
三司都督諸州軍事昶屢為將帥太祖嘗曰不煩國

家士馬而能威服氐羌者趙昶有之矣周世祖錄前
後功封長道郡公卒

隋

牛弘字里仁安定鷄觚人周襲封臨涇公隋開皇初進
爵竒章郡公奉敕修撰五禮定雅樂累授大將軍吏
部尚書右光祿大夫大業三年從拜恒岳壇場珪幣
禪時牲牢並弘所定還下太行引入內帳賜以同席
飲食六年卒謚曰憲

宋

洪皓字光弼鄱陽人少有奇節慷慨有經畧四方志登政和五年進士第建炎三年五月時議遣使金國張浚薦皓於呂頤浩皓方居父喪頤浩解衣巾俾易墨衰經入對乃遷皓五官擢徽猷閣待制假禮部尚書為大金通問使龔璘副之皓至太原留幾一年金遇使人禮日薄及至雲中危雅滿迥二使仕劉豫皓曰萬里銜命不得奉兩宮南歸恨力不能磔逆豫忍事之

耶不願偷生願就鼎鑊無悔粘罕怒將殺之旁一帥
曰此真忠臣也目止劍士為之跪請流遞冷山雲中
至冷山行六十日地苦寒四月草生八月已雪而璫
獨至汴受豫官當皓之在雲中也二帝遷居五國城
皓密遣人奏書以桃梨栗麵獻二帝始知高宗即位
皓聞祐陵訃北嚮泣血旦夕臨諱日操文以祭間者
皆揮涕金參政韓昉嘗令皓校雲中進士試皓固以
疾辭未幾金大赦許使人還鄉皓與張邵朱弁三人

在遣中皓自建炎己酉出使至紹興十二年七月還
留北中凡十五年同時使者十三人惟皓邵弁得生
還皓見秦檜言室撚寄聲檜怒甚後安置英州至南
雄州卒復徽猷閣學士謚忠宣皓撰松漠紀聞金國
文具錄等書子适遵邁

閻進隸宣武建炎初遣使通問進從行既至雲中府金
人拘留使者散處之進亡去追還留守高慶裔問曰
何為亡進曰思大宋爾慶裔義而釋之凡三亡乃見

殺臨刑躡身直起盤旋數四卒南嚮就死

朱勣為進武校尉分在尼瑪哈所勣見尼瑪哈數日遠求妻
室尼瑪哈喜令擇所虜內人妻之勣取最醜者人莫諭
其意不半月亡去追之還勣含笑死挺下其始求妻
者所以固尼瑪哈也

朱弁字少章徽州婺源人少穎悟晁說之妻以兄女建
炎初議遣使問安兩宮弁奮身自獻詔補修武郎借
吉州團練使為通問副使至雲中見金宗翰邀說甚

切宗翰不聽使就館守之以兵弁復與書言用兵講
和利害甚悉紹興二年金忽遣宇文虛中來言和議
可行當遣一人詣元帥府受書還虛中欲弁與正使
王倫探策決去留弁曰吾來固自分必死豈應今日
覲倖先歸願正使受書歸報成兩國之好蚤申四海
之望則吾雖暴骨於外猶生之年也倫將歸弁請曰
古之使者有節以為信今無節有印印亦信也願留
印使弁得抱以死死不腐矣倫解以授弁弁受而懷

之卧起與俱金人迫弁仕劉豫且誅之曰此南歸之
漸弁曰豫國賊吾嘗恨不食其肉又忍北面而臣之
吾有死耳金人怒絕其餼遺以困之弁固拒驛門忍
饑待盡誓言不為屈金人亦感動致禮如初久之復欲
易其官弁曰自古兵變使在其間言可從從之不可
從則囚之殺之何必易其官吾官受之本朝有死而
已誓不易以辱吾君也且移書耶律紹文等曰上國
之威命朝以至則使人夕以死夕以至則朝以死又

以書訣後使洪皓曰殺行人非細事吾曹遭之命也
要當捨生以全義爾乃具酒食召被掠士夫飲半酣
語之曰吾已得近郊某寺地一旦畢命報國諸公幸
瘞我其處題其上曰有宋通問副使朱公之墓於我
幸矣衆皆泣下莫能仰視弁談笑自若曰此臣子之
常諸君何悲也金人知其終不可屈遂不復強會宗
翰等亡弁密疏其事及金國虛實曰此不可失之時
也遣李發等間行歸報其後倫復歸又以弁祭徽宗

文為獻其辭有曰歎馬角之未生魂消雪窖攀龍髯
而莫逮淚灑冰天思陵讀之感泣八年金烏凌阿思
謀石慶充至杭稱弁忠節詔附黃金三十兩以賜十
三年和議成得歸以所得六朝御容及宣和御書畫
為獻秦檜沮之僅轉奉議郎十四年卒弁文慕陸宣
公詩學李義山金國名王貴人多遣子弟就學弁因
文字往來說以和好之利及歸述北方所見聞忠臣
義士朱昭史玩張忠輔高景平孫益孫谷傳偉文李

丹五臺僧寶真婦人丁氏晏氏小校閣進朱勣等死
節事狀請加褒錄有聘遊集四十二卷

遼

耶律孟簡字復易裕悅烏哲之五世孫性穎悟六歲父
劉嘉努晨出獵俾賦曉天星月詩孟簡應聲而成父
大奇之既長善屬文大康初樞密使耶律伊遜以姦
險竊柄出為中京留守孟簡與耶律庶箴表賀未幾
乙辛復舊職銜之謫廵磁窑關時雖以讒見逐不形

辭色過林泉勝地終日忘歸明年流保州及聞昭懷
被害不勝哀痛以詩傷之作放懷詩二十首序云禽
獸有哀樂之聲螻蟻有動靜之形在物猶然況於人
乎然賢達哀樂不在窮通禍福之間易曰樂天知命
故不憂是以顏淵簞瓢自得此知命而樂者也予雖
流放以道自安又何疑耶大康末始得歸鄉里詣闕
上表請修國史乃編耶律赫魯烏哲休格三人行事
以進命置局編修後仕至昭德軍節度使卒

金

赫舍哩良弼本名羅索輝發川人父太宇世襲佛寧徙
宣寧天會中選諸路國子學生送京師良弼與納哈
塔椿年皆童外列選望見丞相希尹於塗歎曰吾輩學
丞相文字千里來京師固當一見乃入傳舍求見拜
堂下希尹問曰此何兒也良弼自贊曰有司所薦學
丞相文字者也希尹大喜問所學良弼應對無懼色
希尹曰此子他日必為國器留之數日年十四為北

京教授學徒常二百人時人語曰前有古新後有羅
索從學者後皆成名年十七補尚書省令史簿書過
目輒得隱奧雖大文牒口占立成詞理皆到時學希
尹之業者稱為第一後納哈塔椿年拜參知政事薦良
弼才出己右賜今名海陵謂椿年曰卿可謂舉能矣
常人多嫉勝己者卿舉勝於己者賢於人遠矣大定
中仕至左丞相十八年表乞致仕歸田里上遣使慰
諭曰聞卿將往西京養疾彼中風土非老疾所宜良

弼奏曰臣豈敢望到鄉里便可愈疾臣去鄉歲久親
識多已亡沒惟老臣獨在鄉土之戀誠不能忘若使
一還鄉社得見親舊死無恨矣乃授和掄松科明安
而俾其子符寶哈達攝事給丞相俸廉遂致仕歸是
歲卒年六十遣太府監伊喇慥同知西京留守王佐
為救葬祭奠使追封金源郡王命翰林待制伊喇履
勒銘墓碑謚誠敏明昌五年配饗世宗廟庭

王元節字子元弘州人也幼穎悟雖家世貴顯而從學

甚謹渾源劉撝愛其才俊以女妻之遂傳其賦學登
天德三年詞賦進士第雅尚氣節不能隨時俯仰罷
密州判官逍遙鄉里以詩酒自娛號曰遯齋年五十
餘卒有詩集行於世從孫國綱有材器為監察御史
開興元年關陝完顏總帥屯河中府與元軍戰敗績
哀宗遣國綱乘上殿馬徑詣河中間敗軍之由還至
中途值元兵見害

元

劉秉忠字仲晦其先瑞州人世仕遼為國族曾大父仕
金為邢州節度使因家焉遂為邢人秉忠年十七為
邢臺節度使府令史以養其親居常鬱鬱不樂即棄
去隱武安山中後遊雲中留居南唐寺世祖在潛邸
即海雲禪師被召過雲中聞其博學多材藝邀與俱
行既入見應對稱旨屢承顧問海雲南還秉忠遂留
藩邸至元初拜光祿大夫位太保叅預中書省事詔
以翰林侍讀學士竇默之女妻之

明

馮勝定遠人洪武元年由懷慶踰太行克碗子城取澤潞擒元右丞賈成于猗氏克平陽絳州詔右副將軍勝居常遇春下偏將軍湯和居勝下偏將軍楊璟居和下遂渡河趨陝後封宋國公數練兵大同拜大將軍二十五年命籍太原平陽民為軍立衛屯田尋偕潁國公傅友德練軍山西諸公侯皆聽節制二十七年被害

李文忠字思本盱眙人洪武二年命會攻慶陽師次太原間大同圍急曰兵可無西也援大同便軍吏曰專命可乎文忠曰閩外之事苟利於國專之可也遂出雁門大破北師拜左副將軍封曹國公六年行山西邊留屯代縣七年出白登秋進師豐州擒故官十二人馬駝牛羊甚衆窮追至百千兒乃還卒追封岐陽王謚武靖

仰瞻長洲人為大理寺丞王振用事惟瞻與大理卿薛

瑄不往會與瑄辨殺夫寃獄遂謫戍大同景泰初召
為右寺丞執法愈堅加少卿

秦世英陝西三原人進士蓬萊知縣後戍陽和講學賦
詩與諸士為忘年交後赦回至今後學思之

馮杰直隸任邱縣人官禮科給事中後謫戍大同時士
大夫多從之遊後回籍

國朝

朱彝尊字錫鬯秀水人嘗遊大同望季陵臺入太原訪

卦山蒙山晉水諸勝雅嗜金石文搜剔窮巖敗塚遇
殘碑斷碣手自摹摹竟日不忍棄去夙有子猷癖雖
儻舍必擇有竹地以居客大同地寒苦無竹至藝葦
以代之後舉博學宏詞官檢討

山西通志卷一百四十七